

廣平府志

ル 5
1572
18



凡名
1572
18



重修廣平府志卷四十九

列傳四 明上

明

史鑑成安人洪武初入太學讀書太祖嘗於暑夜微行見鑑讀書不輟異而問之對曰聖如大禹猶惜寸陰臣何敢虛曠以負作養上嘉之擢都御史時有宦寺謀干朝政鑑疏請防微杜漸又以用刑太繁疏言新國宜用輕典上並嘉納

舊志

李九思威縣人洪武初以明經辟任本縣儒學署教諭經明行修文學優邃教法嚴明士多成就嘉靖五年舉

祀鄉賢 威縣志

單信廣平人洪武時由監生任山東道監察御史按行屬郡剛正無私貪豪屏迹稱職部奏留復任一載軍政井然可觀陞西川道提刑按察司僉事強暴消沮弛禁利民愛若父母南蠻犯界宣諭禍福嘉靖元年舉入鄉

賢祠 廣平志

張亨字伯達邯鄲人事母至孝性質實通敏明經義曉音律器度宏偉洪武十七年詔天下郡縣舉人才時亨年二十二本縣首以上聞授河南嵩縣知縣尋改山西石樓知縣兩地皆著政聲會實徵事連坐謫戍瀋陽隰

州知州楊魯力薦其賢復除長葛縣丞尋丁內艱永樂三年起服謁選留工部六年復除文水縣丞卒於官 邯鄲志

藺從善字有恆磁州人洪武二十六年鄉試第一授山東陵縣教諭遷揚州府教授成祖時擢翰林編修與王直錢習禮等十五人侍太孫講幄凡歷十年所上論皆帝王要道累遷至洗馬宣宗嗣位同官皆營擢顯要而從善獨與王直留滯不調日坐閣中繙讀祕書數年乃遷學士漸見信用正統四年與王直典會試取楊鼎等百人人稱其得士年七十援例乞休帝慰留之又四年

得請一時名公卿賦詩祖送甚盛還里卒祀鄉賢祠

志

王鶴字九皋永年人永樂三年舉人任揚州府推官時

漕務孔亟獲罪者多鶴悉心經畫全活甚眾擢御史按

四川率都司進兵平建昌喇嘛之亂復按江北揚州士

民遮道以迎尋陞苑馬寺少卿致仕

永年志

郝珩廣平人永樂三年領鄉薦官吏科給事中秉公彈

劾累遷至山東左布政使旬宣有聲輿論推重卒祀鄉

賢祠

廣平志

張鏞肥鄉人永樂十八年舉人父彬元以人材舉樞密

院判官有學行元末避亂至肥鄉遂家焉鏞選序班宣

宗偉其狀貌擢御史出為平涼知府時平涼寇發鏞經

畫攘卻之民立平寇碑以頌其功終山東鹽運使

舊志

郭瑀威縣人永樂十八年舉人任戶部主事籌量國計

出納維允陞刑部郎中門無私謁理冤獄錄繫囚多所

裨益子銓進士

分省人物考

申廣永年人任靈璧主簿性清潔無敢干以私者

永年志

郭恕字安仁雞澤人永樂舉人歷思南潮州府推官以

明允稱擢御史屢有建白英宗賜錦衣以旌其直轉山

西參議守雲中雁門積糧撫士要地賴以無虞遊宦不

挈家屬在思南止一僕又以不檢遣歸萬里之外一身
遠寄及歸老林泉儉素如寒士

舊志

徐敬永年人永樂十八年與肥鄉郭謙共執唐賽兒妖
黨謙授永年丞敬入太學正統間授戶部主事進郎中
清理陝右邊儲三年討播州寇督餉有功天順初擢福
建布政使有能聲子英成化丙戌進士官御史以直聞
終四川副使弟政天順己卯舉人知西安府時三年不
雨歲大饑政均賑戢暴民賴以安陞河南參政祀西安

名宦祠

永年志

郭謙肥鄉庠生以捕唐賽兒黨功授本縣主簿陞永年

縣丞妖黨株連者數千人或欲按籍搜捕以邀功謙取
籍投火中曰此愚民被惑者耳渠魁已獲彼脅從何治
爲友人徐敬起而揖之曰公陰德不減東海于公克昌
厥後矣年九十七終子忠成化五年進士任戶部主事
督諸場芻賦宿弊盡革遷郎中出爲處州府知府嚴關
防判訟獄聲冠浙中衆爲立生祠祀之忠長子鄒天資
高邁經目成誦侍郎張海奇其才以女妻之登宏治九
年進士宰吳江廉明剛斷吏民畏服未一年以憂解官
吳人感德祀名宦又立懷賢亭焉累遷至河南道御史
屢劾權貴其師楊邃菴以詩規之不少沮竟以此罷歸

居林下者三十年卒鄧從弟郊正德三年進士知海甯縣以廉謹爲威嚴以誠信代刑罰無一毫苟且陞南京戶部主事士民爭相餽贖皆力卻之以疾卒於路海甯人請於司府立像名宦祠郊弟鄩正德五年舉人授蒙城令以愷悌得民心有流寇犯蒙境鄩嚴陣以禦寇遁去時歲薦饑人相食鄩多方募粟畫地以施全活者甚衆尙書席公奉詔督賑嘉鄩能頒其法於他州縣且表薦之而竟弗遷遂解組歸恬靜自守未嘗妄干有司鄩孫崇嗣嘉靖四十一年進士歷湖廣陝西副使所在有聲陞參政卒於官

肥鄉志

賈銓字秉鈞邯鄲人永樂末進士宣德四年授禮科給事中數有參駁英宗踐阼旣肆赦復命獻在京重囚多所原宥從銓請推之南京秩滿出爲大理知府王驥征麓川饋運有勞驥薦之麓川平擢雲南左參政仍知府事尋以驥言還治司事正統十二年左右布政使闕軍民數萬人頌銓參贊軍務侍郎侯璉等亦疏請銓遂得擢土官十餘部歲當貢馬輸差發銀及海肥八府民歲當輸食鹽米鈔至景泰初皆積逋不能償銓等爲言除之治行聞賜誥旌異景泰七年九載滿當入都軍民乞留命還任天順四年與梁燾等舉政績卓異戶部初闕尙

書王翱欲擢銓帝問李賢賢曰聞其名未見其人也及是來覲帝命賢視之還奏貌寢乃以爲右副都御史巡撫山東尋兼撫河南山東歲祲請召還清軍御史河南饑請停徵課馬皆許之成化初左都御史李秉督師遼東召銓署院事中官唐慎等從征荆襄還杖死淮安知事谷淵自奏丐免銓請罪之乃付慎等司禮監命法司罪其從人未幾卒官諡恭靖銓在雲南治行爲一時冠比爲巡撫清靜不自表暴吏民亦安之

明史列傳

申達永年人太宗北巡迎獻三策上嘉之以人才舉知汝甯府加參政有清白稱子甯宣德中舉賢良方正至

京師引疾歸內行甚篤沉志經籍於詩書尤長時稱二

經先生

舊志參縣志

羅綺磁州人宣德五年進士英宗卽位授御史按直隸福建有能名正統九年參贊甯夏軍務踰年當代軍民詣鎮守都御史陳鎰乞留以聞命復任尋擢大理右寺丞參贊如故常以事劾指揮任信陳斌二人皆王振黨十一年四月信斌訐綺不法事下總兵官黃真覆覈真謂綺常詈宦官爲老奴以激怒振召還京法司擬贖振改令錦衣衛再鞫指揮同知馬順鍛鍊成獄謫戍遼東景帝立綺訴寃不聽尋用尙書于謙金濂薦召復故官

進右少卿副李實使瓦剌上皇還以勞擢刑部左侍郎
 明年二月出督雲南四川軍儲已代寇深鎮守松潘賊
 首卓勞糾他砦阿兒結等頻為寇綺禽斬之土官王永
 高茂林董敏相讐殺守將不能制綺搗永巢誅之又敗
 黑虎諸塞番在鎮七年威名甚震天順初召為左副都
 御史御史張鵬楊瑄劾石亨亨謂綺與右都御史耿九
 疇使之并下獄降廣東參政綺鞅鞅未赴明年閏二月
 綺鄉人告磁州同知龍約自京還與綺言天子仍寵宦
 官刻香木為王振形以葬綺微笑云朝廷失政致吾輩
 降黜奏上捕綺下吏坐死籍其家家屬戍邊婦女沒入

浣衣局憲宗立赦為民還其資產

明史 案舊志綺字 尚綱景泰元年英宗

北狩也先遣使議和綺為副使詣北營開諭也先於是
 始許歸約正使李實先歸綺復與北使同至山西等處
 調回一帶擾邊土馬往返塞上凡三月翠華南旋綺與
 實有同功焉英宗復辟後石亨曹吉祥恃功專恣綺率
 十三道御史糾劾帝怒命逮綺等下獄詰朝雷電盛作
 大風拔木吉祥門前老樹皆折京師震恐帝意動始釋
 之官至刑部左侍郎致仕於城西五里作綠野亭以自
 樂後鄉人王俊仇誣綺前在松潘受番人金詔削籍綺
 默不辯公
 論寃之

馬麟字宗魯廣平人宣德間由歲貢授盩厔縣令宦邸
 蕭然一如貧士課民農桑輒開庾給之有爭訟不事考
 訊諭以義而民爭止宛然如家人父子三年而閭閻夜
 戶不閉當事者遣使索賂麟仰天歎曰忍赤子膏脂以

媚上取榮而不念夙盟乎遂告歸府司慰留百姓遮道號泣麟不顧抵家環堵不蔽風雨饗飧不繼怡然自適不入城市者四十餘年

廣平志

韓定威縣人正統初以善書入翰林授鴻臚寺序班累遷太僕寺少卿修續資治通鑑成加從三品俸世襲錦

衣千戶

威縣志

王允武字莫邦號棘亭廣平歲貢初授南康通判粗糲自甘視篆萬年裁省庶獄加意學校時有井泉江水之歌萬年人立祠尸祝之遷兩淮運副常例緡錢一無所取升慶王府長史會忤當道意遂投劾歸

康熙志

李宏字宗大磁州人正統三年舉人授陝西涇州知州時久旱宏齋沐乞禱遂大雨涇地高少水宏區別形勢鑿井便民立祠祀之擢池州府以剛介忤當道致仕

卒祀鄉賢祠

磁州志

張斌永年人正統四年進士任戶部主事忤宦官王振謫戍遼東後朝議以浙江鹽法多夙弊惟斌可以釐正復前職斌往持法剛正為權奸所忌中毒卒時咸悼惜

畿輔人物考

馬顯廣平人正統七年進士授戶科給事中己巳之變扈駕北征幾沒於陣景泰初進都給事中指陳得失多

所裨益尋出為河東鹽運使鹽法流通國計用裕天順
 戊寅擢四川左布政使時蠻寇猖獗境內繹騷顯贊畫
 戎務調度軍餉俱有條不紊秩滿陞巡撫都御史奏復
 留三年成化庚寅擢南京兵部右侍郎值歲大祲奉詔
 巡視鳳陽等郡撫窮獨擊奸慝民賴安堵轉左侍郎未
 幾丁內艱服除乞致仕詔許之退休林下十五載卒年
 八十有五訃聞遣官諭祭分省人物考
 安永邯鄲人正統九年舉人累官至江西瑞州府知府
 居官廉平致仕後一貧如洗祀鄉賢邯鄲志
 楊忠永年人正統間任錦衣衛百戶性至孝父喪廬墓

三年有司奏聞旌表明史孝義傳敘參縣志

趙象賢曲周人庠生事親以孝聞母卒哀毀過禮既葬

負土築墳廬於墓側三年事聞旌表同上

李果字尙用成安人景泰元年舊志作正統依通志改舉人授平

陽通判分理易州厰有豪民長惡不悛果諭以禍福遂

悔悟遷杭州同知築隄以障湖水居民德之有開湖偉

績千秋利捍海高名萬古傳之詩陞濟南知府卒著書

見藝文舊志

張錫字天子邯鄲人景泰舊志作正統四年舉人官揚州府

同知專督糧儲先是豪右攬糧率厚賂督儲以圖緩解

而從中侵尅故民賦雖完國儲多闕錫械一行貨者置之法弊遂革稅額以清其菑吏胥嚴有終任未見其一

笑者自守以下率嚴憚之平遼東行太僕寺少卿致仕卒祀鄉賢祠

邯鄲志

張憲字宗周成安諸生母喪三日不食哀毀幾絕既葬伏墓側不肯還戚友乃代為結廬憲朝夕哭奠負土成墳夜遇羣盜求火憲以無火應盜亦不忍加害景泰中

旌後任山西布政司都事祀鄉賢祠

成安志參通志

傅海威縣人父喪廬墓虎至叱之曰我為父母死何懼

虎即去景泰中旌

畿輔通志

劉憲曲周人國子生孝行素著父病侍湯藥惟謹額天以身代及卒廬於墓側負土築墳繞墓植柏有祥瓜白兔瑞後母卒擇期合葬有日矣哀毀骨立病不能履夜夢羽衣道士醫以藥病隨愈啟塘有芝草產於棺會葬者咸嗟異焉事聞詔旌其閭

曲周志

案通志列劉憲字君式永年庠生親沒廬墓三年致白兔馴鳩之異事聞旌表詔賜八品文職復其身以終查永年志無此人疑係一人通志誤入

劉誠字敬之雞澤人弱冠登天順元年進士擢翰林院檢討輔導德王尋陞秀王府左長史從王之國賜四品

章服王薨改甯國府同知仍食四品俸遷湖廣布政司右參議童時喪父哀毀如成人母以孝聞家貧爲童子師以養母旣仕凡俸祿所入悉歸於母錙銖不入私室每讌會先具甘旨進母然後出以待客終其身以爲常嘗以公事莅施州一日方治文書忽潛然不自勝從吏請其故誠曰吾思吾母不得見耳兄早喪事寡嫂敬而有禮其孝友蓋天性也從國子丞閻子與學易謂焦贛易林專取納甲飛伏非聖法乃作周易衍辭其文奧雅深於易者韙之又取漢唐宋詔誥章表可爲訓者作典謨遺旨楚漢以降詞人之作散見諸書採其得三百

之旨者作風雅遺音邵子皇極經世自鄱陽傅氏後知之者鮮誠深究其理欲加之訓釋而未就也蔡氏洪範皇極內篇揲法不傳精思潛玩遂得其法且爲補其釋數之缺蓋其立志直欲與濂洛關閩諸儒同歸不欲以文詞名也其爲長史作千秋日鑒錄以獻王嘉納之及王就國汝甯在途淹留上章懇諫王卽兼程以進旣抵國羣小欲毀孔子廟以廣王宮力言不可廟得不毀嘗講書西伯戡黎誠主吳氏說曰戡黎者武王也右長史趙銳主孔氏說曰戡黎者文王也誠曰紂都朝歌黎在畿內豈有人臣伐畿內之國尙能退就臣位乎此乃孟

津之兵首事於黎耳相與辨於王前王解之其在甯國
湖南化民振俗嘗引古誼諭之不加笞罰或譏其迂誠
曰吾道如是也居官廉俸祿之外不妄取成化十六年
六月疽發於背慮貽母憂有問者輒曰無傷也疾亟以
手拊牀曰我死不足惜第痛母老不獲終養耳遂卒年
四十有八卒之日囊無寸帛幾不能斂賴僚屬相率致
賻喪乃克歸

分省人
物考

劉玉字仲璽磁州人生有膂力給侍曹吉祥家從征麓
川授副千戶積功至都指揮僉事天順元年以奪門功
進都督僉事尋充右參將守備潯州慶遠蠻剽博白及

廣東之甯川玉偕左參將范信邀擊敗之俄命分守貴
州從方瑛討東苗殲千把猪討西堡苗繫其魁楚得先
後斬首千級毀其巢而還旋改右副總兵鎮守貴州吉
祥誅玉下吏當斬以道遠不與謀免死謫海南副千戶
六年帝將以谷登爲甘肅副總兵李賢言登不任玉老
成乃復以爲都督僉事右副總兵鎮守涼州咎哂族叛
會兵平之進都督同知成化四年滿俊亂固原白圭舉
玉爲總兵官統左右參將夏正劉清討之兵分爲七玉
與總督項忠抵石城賊已數敗會毛忠死玉亦被圍中
流矢力戰得出相持兩月大小百十戰竟平之進左都

督掌右府事自愬前西堡功命增俸百石掌耀武營六年充左副總兵從朱永出延綏五月河套部人犯玉帥眾禦卻之逾年卒贈固原伯諡毅敏玉雖起僕隸勇決過人善撫士所至未嘗挫衄滿俊之叛據石城險屢敗官軍玉戰最力及論功祇賜秩一級時惜其薄子文襲

指揮使明史

鄭賢肥鄉人少孤力學鄉里推重與御史莊鳳知州郭敏相友善時稱為肥鄉三傑登天順四年進士授河內尹仁厚平恕居二年以母喪去士民追思之服闋改知新鄭縣賢治之一如河內未幾以疾解組歸鄭民德之

列名宦祠祀焉賢退居凡二十年足迹未嘗輕入城府人咸稱其有古人之行云分省人物考

鄭銘邯鄲人天順八年進士授監察御史成化二年巡山海關繼巡陝西茶馬皆有靖邊足用之畧尋按蘇州等處擊貪暴獎善良伸冤抑聲振南畿時有嘉定賊越獄倡亂者銘率民兵勦平之陞山東按察司副使有闔宦譖之左遷山西參議後得直累擢本省左布政使以老乞歸卒於家人咸稱其宦蹟鄉評兩無玷云分省人物考
侯服成安歲貢任卽墨丞值朝命頒銀市米戚畹會昌侯孫繼宗弟顯宗攬納米患服持正遣使以幣至服卻

之使怒叱服服答之繼宗憤甚囑觀察使某誣以罪當
 流服子琛擊登聞鼓訟寃下法司覆讞繼宗復賂當事
 者嚴刑逼承琛一呼而刑折如是者七問官乃實奏英
 宗顧李文達曰皇親豈可如此遂褫繼宗職諸黨悉伏
 辜服乃挂冠策蹇而還服孫驄以孝聞父疾五年朝夕
 不離側父沒不飲食者三日既葬欲廬墓以母在不果
 及母沒合葬遂廬守焉正德六年流賊肆剽劫親戚勸
 之避以不忍辭弟明恐其不免相對泣未幾賊至兄弟
 爭死賊憐之遺緞一端書名而去嘉靖十三年奏聞詔
 建坊以旌成安志

王濬威縣人成化二年進士任監察御史巡按陝西山
 東蘇松常鎮等處所至有聲其按蘇松時值隆冬濬河
 民多凍死濬奏止之全活者無算累官南京都察院右
 僉都御史巡撫甘涼提督鄖陽荆襄等處練兵儲糧民
 安盜息卒於官時兵部尚書王越氣岸嶄然少許可嘗
 為詩以贈濬有學海洗清三省地筆鋒撐住半邊天之
 句分省人
物考

郭銓威縣人成化五年進士任戶科給事中志高行潔
 性敏學勤當官三事成無愧章上悉舉行方將大用卒
 於官識者惜之祀鄉賢祠威縣志

武尙信磁州人成化七年舉人歷知香河寶坻縣知香河時歲荒民疫尙信爲施藥餌給湯粥所活以萬數寶坻有郃氏子爲其婦所殺瘞郭外人莫知也尙信過其墓馬驟驚發棺驗屍顛門有釘乃按其婦與姦者置之法遷湖州通判途中夢二青衣拜曰奉命送公出險黎明舟至閘口上流有斷絙大艦乘迅湍而下舟幾覆忽若有轉移之者遂獲安後改慶陽以內艱歸疾卒舊志

賀思聰永年人成化十一年進士任亳縣知縣吏畏民懷以憂去服闋亳人三詣闕請復任康熙志又官二年汲汲以備荒爲政儲粟至二萬餘石江南通志奏最擢光祿寺

丞遷少卿以峭直謫陝西運同民立祠祀之擢汀州府以疾歸杜門卻掃非公事不妄干有司永年志

紀傑字士英磁州人成化十一年進士知廣平時漳水溢城幾不保傑禱於神水遽退時論異之擢南京監察御史有天長巨獄株連數百人莫能定讞傑至遂折服以連章劾權閹蔣琮左遷同州州判舊志

連盛永年人成化十四年進士拜監察御史剛正方介彈劾不避權貴正德初出爲山東運使劉瑾擅權索賂中外盛抗直不少屈瑾摭他事中傷之竄海南毅然攜家以往瑾誅詔復原官會盛已卒遣使諭祭祀鄉賢畿

輔人物考
參縣志

安郁邯鄲人成化十六年舉人任舒城縣知縣起服補海門知縣秩滿擢晉甯州知州慈祥愷悌所至人感卒

祀鄉賢邯鄲志

蔣勛字世功肥鄉人成化十七年進士累官至河南僉事所至有冰蘖聲咸甯通志作咸甯伯王越贈以詩曰敢為

公道事無愧好官名肥鄉志

李盛磁州人成化十九年舉人仕終祁州知州在任廉能有聲豪右斂迹士民悅服祀鄉賢祠磁州志

張朴磁州人成化十九年舉人任順德府推官心古貌

純操廉行直治獄平反民無冤枉以事忤權奸浩然勇

退祀鄉賢祠同上

謝景星字天瑞邯鄲人成化二十年通志訛作三十進士初知

來安縣剔弊澄奸用法嚴峻累遷至漢中府漢中山谷險阻流民竄穴其間居人驚擾景星為編戶籍俾主客

相安又治礦徒郵棧驛均悉心規畫民愛戴之舊志

馬子聰字舜達廣平人顯從子成化二十三年進士授

南京禮科給事中劾都御史錢鉞之倖進南京太監蔣琮之奸惡朝廷於是罷錢鉞繫蔣琮於錦衣獄未幾丁

外艱去服闋復除北京禮科再轉戶科時將於萬歲山

建毓秀亭費用不貲中外洵洵子聰具疏以陳事遂寢
前後數十疏皆深切時政然終以此忤巨璫幾為中傷
遂乞假省親許之明年吏部兩推南藩大參竟為宦官
所阻是年病卒分省人物考子偉以貢生官棲霞訓導洛川
教諭事母以孝稱廣平志

董威威縣人成化二十三年進士任南京戶部郎清慎
自持陞江西參議時劉瑾擅權達官多納賄交歡威獨
以剝民取寵為恥瑾乃矯詔罰譴輸粟居庸尋轉參政
遂上章求去畿輔人物考

李朝廣平人累試棘闈不第成化時以歲貢授山西遼

州同知有惠政署榆社縣有吏犯贓陰賄金二百斤之
置諸法有黃緣者獻乳彪取媚朝曰今為乳虎大則噬
人何用畜為卻之及歸田惟草廬數椽而已孫經綸以
選貢除府經歷有苗賊老喪妻犴猪等掠殺為患悉平
之會丁內艱除服補廣西潯州府經歷卒於官撫按藩
臬厚遺殮歸士論惜之廣平志

馬亮成安人成化時知樂安縣清直廉明門無私謁山東志

薛謙邯鄲人宏治元年歲貢知陝西金縣民有疾疫為
醫藥以療之死者為治棺以瘞之陞浙江金華府通判

時大旱謙率眾步禱大雨如注致政歸年九十有一卒

分省人物考

王育英威縣人宏治二年舉人任建平知縣以賢能改績溪薦剡交上因親老乞終養非公事不見邑宰年九十有七卒其官聲鄉議均白璧無玷同上

閻秉初字性之邯鄲人以宏治五年鄉舉授汝甯府通判當道數以大牒委之剖決如流案無留牘正德六年薊盜起所向無全城秉初奉總督彭澤檄保禦光固諸州縣參將以下咸受節制率其子民皞親犯矢石屢獲賊渠澤大奇其才力薦之值外艱歸病卒邯鄲志

胡瓚字伯珩永年人宏治六年進士授行人三奉册封皆力卻饋遺轉御史按秦中康熙志故事御史按事例一年歸以忤劉瑾故留陝二年始得代分省人物考瑾誅陞南

京大理寺丞尋陞少卿時武宗命司理監太監蕭敬錄囚大理寺瓚時握篆遇有疑獄輒為反覆辨之敬歸白上謂為真法司遂先事有寶鑑內醞之賜事竣復賜采幣羊酒大司馬胡世甯初在江西疏逆濠異志逮繫獄倖佞脇刑官必坐以誣告親王罪至死瓚曰濠謀賴世甯以發而置之極刑何以服天下遂與輕比議上留中眾謂不測瓚不為動後世甯竟得戍遼東瓚等但奪俸

丙子陞都察院左僉都御史巡撫大同興利革弊剔蠹除奸宗室有遺毒地方瓚疏其罪復上邊務六事其畧原情罪以責戰守嚴事例以防推避體人情以省支費養間謀以資探報明賞格以激人心增兵備以專經略上皆嘉納之庚辰武宗幸大同適邊警告急瓚督官軍與戰有功上錫璽書褒美及蟒衣三襲復推恩任一子爲錦衣衛百戶瓚以沙漠之地不宜久留而扈從邊兵及諸從臣多怙寵大爲邊地害上疏極論請回鑾至引漢袁盎諫文帝馳竣坂之論不報因乞休乃與告歸辛巳卽家起操江留都疏陳江洋事宜大略專委任明

約束實軍伍示激賞處戰艦時操練上皆從之尋陞右副都御史癸未陞南京刑部右侍郎尋轉北刑部甲申陞戶部左侍郎乙酉大同卒亂戕害撫臣劫掠庫藏朝廷命大臣撫之益驕悖天子乃命瓚提督軍務借總兵官都督魯綱統兵三千人往瓚曰此首惡數人耳豈宜濫及無辜惟殲厥渠魁當自定耳未至大同四十里駐兵陽和授方略於羣將由是首惡就誅地方悉平還京上嘉厥功有白金采幣羊酒之賜時有短瓚於上者不與辨第屢疏乞休溫詔勉留之初魏國有賜田山海撫甯諸縣幾千頃後讓歸官業已給民而其孫光祚復請

之瓚謂撫甯逼近邊塞貧民世守之業軀命所關奪之恐生意外變由是上卒不與戊子陞南京工部尙書奏裁內監局冗食工役之半履任九閱月致政歸逾月以疾卒瓚天性忠亮質直事親孝處兄弟不私其財以故累大官囊無厚積居言路舉刺務存大體不事苛細以取時譽游歷臺省惟自信自守不爲探刺趨避蓋長者云

翟鑾撰

神道碑參明史蔡天祐傳

卒賜祭葬

康熙志

胡璿字明山瓚之弟博學精二戴禮以歲貢授祥符主簿開封諸邑志多所裁定年七十吟詠不倦子應徵以廕仕左軍都督府都事累官兩浙鹽運使司同知以廉

稱姪應文博學善屬文植品勵行授生徒自給不干謁有司成嘉靖三十二年進士歷浙江道御史彈劾不避權要出守揚州府卓著政聲孫士偉天啟元年舉人任蒲臺縣有政績祀鄉賢

永年志

胡應聘字子儒永年人瓚次子以平亂功廕一子錦衣

千戶應聘兄讓合弟襲應聘不受時兩賢之仕吳江縣

丞以廉稱

同上

宋珣字璘若廣平人宏治六年由歲貢薦授上津縣令俗僻陋民間以鍤代耕婦女不諳紡織珣爲搆匠赴彼作器具給之日巡行里中親課耕織且率其子弟敦孝

弟習禮讓戶喻家曉三載循聲大著當道獎薦以時尙
人任又士民頻詣臺臬借寇滿九載遷守光州不就職
歸家惟德化津陽詩及孝弟耕織圖數卷上津士民來
壽珣者三後卒乃已

廣平志

李岳字嵩山成安人宏治八年舉人謁選時或諷以納
賄當事岳不可因選海州州判人皆不平岳曰吾知盡
臣職耳敢論崇卑乎抵任聽斷勤慎每事皆焚香告天
兩臺已列薦之竟乞歸海州人感其德建祠祀之

成安志

朱雱永年人宏治九年以歲貢薦卒業成均授陝州同
知歷官十餘年清慎不渝後乞歸足迹不入城府力田

課子稍有餘卽出以賑鄉鄰

分省人物考

張問政永年諸生父邁危疾籲天乞以身代父歿與弟

敷政廬墓三年

永年志

杜璋字廷器雞澤人宏治十四年舉鄉薦授鄒縣尹流
賊圍鄒督兵守城相持四日城陷子崇熙遇害璋冠帶
危坐堂上賊將刃之縣丞某乞以身代賊義而兩釋之
後改知潞城射洪縣俱著政績以終養乞歸

雞澤志參
山東通志

申綸字廷言永年人宏治十八年進士歷知定襄永康

平陸縣舉廉能第一調太原擢潞州府所至皆有惠政
入爲戶兵二部郎中復出守衛輝有蝗不入境禾生六

穗之異調常州興學課士如恐不及時薛應旗負重望唐順之未知名綸試士先順之次應旗應旗自陳未嘗居人下綸曰唐終當爲子先後果驗以治行卓異首承宴賚歷四川雲南按察副使風裁端嚴得憲臣體致仕歸築室滏水之側約郡中耆宿爲真率會郡守邑令每延訪治道均田賦開閘河多出其議

畿輔人物
考參舊志

申翰字允楨綸子由監生判綏德州州城無井民皆汲於郭外有寇警斷汲道輒多渴死翰禱於神穿井城中綏人德之名申公井遷文安知縣賑饑均平大府下其法於諸郡翰子价字紫巖嘉靖二十三年進士由中書

舍人選工科給事掌吏垣嚴嵩與綸爲同榜進士嵩傾心結納价不爲屈出知鎮江府正疆界抑豪強治甚有聲鎮江民郭愷誣繫十年夢其祖告之曰逢申得脫价至果爲力辯得釋郡人神之歷陞河南按察司副使卒於官

永年志

劉端字表正廣平人宏治時太學生家貧值母喪慟哭旬日不飲食殯後結廬墓側終日悲哀抱土築墳鄉人以孝稱

廣平志

孫修字用吉邯鄲人宏治乙丑進士正德改元拜戶部主事命督逋賦於蘇常嘉湖諸郡修召守令諭以禍福

未幾逋賦悉完改山東道監察御史治獄有聲轉陝西
僉事備兵延綏時糧訓卒敵不敢犯擢理全陝屯政立
法簡嚴歲入倍昔會敵犯秦隴奄至平涼非修部也修
以公務經其地率敢死士百人發勁矢射之敵遂引卻
進副使秦人王元愷誣御史宇文鍾謀逆宦官劉寶奏
行在武宗命逮至軍門鞫之修察無左驗止錄尤重者
數人械送南都寶怒曰謀逆大罪也何僅以如是塞詔
旨修曰按驗無狀焉可累及無辜且誰無子弟公亦宜
自念其家寶噤而止事卒以白巨盜嚴天柱襲破商州
僭號署官巡撫鄭某避去檄修禦之修率兵五千往剿

甫一月薙獮無遺擢山西按察使公廉有威上下憚之
嘉靖癸未擢河南右布政使尋遷浙江左布政使以憂
歸起右副都御史巡撫湖湘賊吏望風解組未幾改南
京操江江洋巨盜陳表剽掠江上居民立賞格躬率舟
師蹙之三月就縛上聞有白金文綺之賜己丑春以災
異自陳詞甚懇惻特賜愈允即日北歸杜門謝客數有
薦者若弗聞也卒年五十六

畿輔人物
考參通志

杜春肥鄉人由歲貢知鎮平縣邑故權油稅官吏朋分
春至悉罷去地宜桑下令每鄉報官地一區給值種桑
以飼蠶又有水陂歲久堙塞請於朝力爲宣洩民享其

利舊志

孫炳字廷輝清河歲貢生授山西廣靈訓導廣靈地瘠而俗陋士鮮知學炳至條著功令士習翕然一新有司咸厚待之終不肯干以私嘗捐俸濟貧寒全活甚眾復為瘞其死者性喜酒客至輒醉醉後吟笑和光藹然工楷書尤精尺牘其為詩清雅可誦子悟領嘉靖元年鄉薦令山東齊東有聲孫沈陝西崇信縣知縣乞養未仕

孫緒撰墓表

李哲成安人以明經官陝西略陽縣潔己愛民不妄取一錢以親老告終養歸卒祀鄉賢又張智成安貢生官

山西平魯衛經歷廉能有聲及歸杜門讀書授徒終老卒祀鄉賢縣志

高震成安人以貢生令渭源縣有廉聲勤恤民隱時大疫虔禱於神遇道士授以術藥全活無算以此精於醫卒祀鄉賢同上

路欽永年人正德五年以監生任汾西縣為政剛果持身廉潔人以私謁者輒謝弗與通祀名宦祠山西通志

宋璜威縣庠生正德六年流賊陷城縛璜父將害之璜抱父請代死賊曳之不去遂遇害璜父得免妻李氏時

年二十一伏屍號泣曰爾能代父死吾獨不能為爾死

耶請併我殺之賊驚歎為孝子節婦遂去舊志

楊鳳肥鄉庠生母卒廬墓側流賊劉六肆剽劫鄉人爭牽避賊鳳泣曰吾忍以吾母為死而棄之耶終不去賊至相約毋犯其廬鄉人就廬藏匿者俱得全活有枯樹復榮隆冬結瓜之異人以為孝感所致子宗智亦以孝

聞同上

張潤身字佩德成安人正德九年進士知西安縣同谷

訪民隱清理田糧得古人均田之意浙江通志擢御史授戶

科給事中歷轉工吏二科有蹇諤聲親老乞養釋服轉兵科都居諫垣十三年巨璫貪弁貴戚近臣多被彈劾

忌者陰擠之出守平陽比至郡問民疾苦百度齟齬居

一二載浩然歸以耕讀課子敦睦族黨為事畿輔人物考

葛覃字延之磁州人正德九年進士知樂清縣廉明敏

斷案無滯牘遷南京戶部主事進員外郎督催閩廣錢

糧總理周密事集而民不擾擢郎中出知平陽府陞陝

西按察司副使清白自勵始終不渝以冒暑巡甯夏等

處獲疾卒祀鄉賢祠磁州志參浙江通志

王錦曲周人正德十一年舉人嘉靖間知孝義縣為政

平易有古人風暇輒延禮諸生疊疊講論始終無間山西通志

通志

劉浩字惟直廣平人正德丙子舉人授山東昌邑縣令雷厲風行如利刃解叢錯有激濁揚清之威好賢禮士履任三載興革多所建白以直道忤時調高密縣謝事而歸居鄉遜讓不伐施財濟物人敬愛之廣平志楊濟號厚菴磁州人性耿介爲文超邁不羣郡守上元金某甚愛重之爲納幣聘武香河女及娶奩具頗盛濟欲悉還之父不允乃分給二堂弟隆平俾資畢姻正德十一年領鄉薦遂以舊宅讓兄淮而別置宅以居兩執親喪哀毀骨立居家嚴肅有聲教人循循有法則病亟謂子桐曰今人誌多溢美吾所深鄙吾死慎勿請誌所

著文集行世

磁州志

王泮字文淵磁州人正德十二年進士知宿松縣值宸濠之變武宗親征軍書旁午泮幹濟裕如調江陰擢陝西道御史疏請世宗孝養兩宮黜張桂芳馬明衡等不報引疾歸舊志

俎居字佩章磁州人正德十二年進士嘉靖初與修武宗實錄歷戶部郎中以議大禮忤旨罷歸舊志

趙龜雞澤人以歲貢任戶部司務忠厚直懇邃於理學夙以清介自守累遷南京刑部員外郎操履益堅有屬吏餽金三百立卻之致政歸行李蕭然杜門養親究心

經學著書行世

畿輔人物考

郭潤字瞻孔雞澤人恕曾孫正德十四年舉人令沁源教民為善不忍用刑不得已應責者往往流涕沁人呼為郭佛甫數月以疾辭官歸寒素攻苦無異諸生時每出遊乘一犢車有心得處歸即書之册郡守聘掌漳川書院諸士無不服從著述甚富

雞澤志

馬鈍字希賢廣平人嘉靖元年貢生先人田三十畝悉付兄弟口授生徒以供二親欣然曰吾父母兄弟免饑寒此身雖窘索胡傷歲值瘟疫流行二親病卧鈍嘗侍藥焚香密禱願以身代時流賊橫掠居民至邑境有賊

首趙姓者令有去馬秀才村五十步而擄掠者死眾賊

唯唯導令越其鄉百步而過皆遙指曰此孝子里也

廣平志

李仁字士元曲周人嘉靖二年進士授戶部主事出守

許墅關清苦自勵撫按為立冰鑑碑轉本部員外郎卒

分省人物考

紀純字一之磁州人傑長子少與安陽崔太史後渠林

慮馬都憲柳泉稱鄴下三俊登嘉靖二年進士初授戶

部主事轉本部郎中遷四川保甯知府郡值久旱歎曰

吾始下車豈可坐視民瘼遂齋沐宿壇禱祈而雨隨應

冬祈雪而雪輒降郡有疑獄爲原情寬宥及入覲郊外
數人跪擁流涕詢之皆前日全活罪人也郡以絲織爲
業前後官未有不染指者純居三年一無所取陞陝西
按察司副使備兵西甯誠心實政恩威兼濟夷夏咸服
嘗巡邊塞西山隘口以絕敵人窺伺之路致政歸博學
好著書祀鄉賢祠

磁州志

連鑛字白石永年人嘉靖五年進士選庶吉士以時例
出補日照縣地瘠民貧多逋賦鑛悉心撫字租稅以充
改建平有虞順者挾妖術據五牙山爲亂鑛設計擒之
擢御史疏請免畿南佞馬從之十三年御史李新芳行

部廣平將入城門卒熱礮不發別熱之比至前所熱忽
發新芳驚走疑永年知縣周謐謀已遂檄正定守備率
兵二千赴廣平擒勦知府及佐貳皆走一城盡空巡撫
周金疏劾新芳下都察院詳議而都御史王廷相庇新
芳與金相爭鑛上疏爲府縣力辯乃黜新芳官得免大
獄鑛累遷至總河都御史是年河決運隄阻後幫四千
七百餘艘鑛自濟趨邳極力疏通至十一月而工竣上
疏曰北河漳邳濟甯地高而水易涸患在春月故啟泉
門以濟之南河自徐州小浮橋引蒲河以濟運而清淮
一帶橫流浩蕩涉之尤難惟春夏之交循途以運俾早

過淮則南河免汜濫之憂北河無淺涸之患矣識者皆

以為確論

永年志參分省人物考

蔡紹先字孝伯成安人性孝友拮据養親不以累諸兄為諸生時有經世志嘗考方輿諸書凡海內山川險夷形勢無不洞晰嘉靖初以明經知長葛縣開渠田清徭役興學息訟多善政晚歸里分田贍族設立義冢四子皆賢可教可賢均成進士

成安志

任芳清河貢生授山東清平縣知縣莅任時百姓鳴鐘鼓迎之為政廉勤以人戶分三等九則均徭役民感其

德惠入祀名宦祠

清河志

馮盛時字嘉際清河人早年補博士弟子員從故城孫太常學學益進嘉靖七年登賢書選授山西榆次縣復補山東聊城縣知縣遷泰安州知州皆有治績恥逢迎當道嘗曰守貧安命豈忍剝民以固位乎遂告歸

同上

賈德潤雞澤人嘉靖十年舉人知沁源縣勸民輸粟實廩以備不虞有敵兵將入境德潤偵知之斂人畜入城中督士民固守城獲保全

山西通志

許一貫字宗魯磁州人嘉靖十年舉人授獻縣知縣才猷通達政事精敏治滹沱河築易州城勤勞著績嬰疾告歸杜門謝客足跡不履公庭舉鄉飲大賓祀鄉賢祠

磁州志

張棐字體周邯鄲人嘉靖十一年進士知延津縣時歲歉多盜棐賑救招徠全活甚眾盜相戒不入境世宗南巡所過郡縣供費不支延津獨得免民呼之爲張母擢南京監察御史按下江激揚風憲遠近肅然未及復命中途感疾卒

舊志

石永字壽卿威縣人嘉靖十一年進士授中書舍人歷雲南河南山西道御史巡按四川所至悉心咨訪秉公勸懲有豪強畏罪伏刺客於永所常過之橋下永至其人忽心痛作聲執訊得實蓋神鬼默佑之也二十四年

掌計典謝絕私交不通關節出知南陽府尋以事降濱州州判怡然就任升南京太僕寺丞知平陽府藩府競訟累年不決永委曲開導訟乃息太宰張潤稱其風寒貴戚威寢權豪戊辰遷陝西副使駐甘州見草木蕃盛詢知舊爲水田以地震泉涇遂求濬其泉五十餘處灌田八百餘頃流亡者爭復業進右參政視涼州地宜耕募民墾闢兼導泉以灌溉甘涼人德之擢陝西按察使累遷至都察院右僉都御史巡撫延綏革冗役禁包占懲負販養勇敢謹間諜飭將練兵有點虜犯灰條溝前後斬首級獲駝馬器械甚眾疊蒙金幣之賜凡三任朔

方歷九年民戴之尤深乙未升兵部左侍郎總督湖廣

川貴等處凡事務責實效不為文具猗賊沈雅舊志作亞當

等勢猖獗督將士擣其巢於淑浦縣龍澤等洞捷聞賜

金幣時督撫請調葉麻等司兵禦倭永上疏極論不便

乞免以安地方省糧餉蒙俞旨著為令三十九年召為

戶部左侍郎瀕行疾卒副使李心學為斂具啟其橐無

餘積咸嗟嘆之分省人物考參畿輔人物考

李僅可字子與清河人嘉靖十七年進士除大理評事

多所平反世稱其明允又嘗論邊事知名丁未出僉事

陝西臺臣以具文武才薦乃遷兵備駐涇邠要地卒於

官年四十六清河志

胡經字伯常磁州人嘉靖十七年進士授長子令擢國

子監丞歷遷戶部員外郎興利除弊所至有聲轉襄王

府長史以親老致仕家居築精舍事父母盡禮讓祖業

於兄課子授徒士林推重祀鄉賢祠磁州志

田應弼字以道雞澤人嘉靖十九年舉人知陝西安定

縣值蒙古圍城應弼死守七晝夜乃解擢御史按雲南

轉四川僉事調雲南討平寇亂欽資金帛尋遷陝西行

太僕寺少卿致仕康熙志

趙永安字泰宇雞澤人稟之後由選貢知博興縣值歲

荒捐俸施粥冬施綿衣歲以為常邑當新城下流常受水患時新城多勢要人無敢抗永安奮然率民夫築隄捍之新城人大譟永安不為動卒以竣工升衛輝通判遷潞王府長史先是王暴薨中外頗有物議永安請按其事左右以萬金營解不許遂中以他事免官舊志

杜秉彝字性之永年人嘉靖二十年進士知無為州以善教得民毀淫祠新社學擢刑部員外郎用法平恕不事深刻恤刑河南治紅羅女獄開釋株連者八百餘人出守池州魏國公侵民蘆洲六百頃捕魏國用事奴置之法以洲還民致仕居鄉值大水浸城秉彝率民捍禦保全郡西多斥鹵力贊守令開濬閘以廣灌溉生八子

廕縻俱成進士廓舉於鄉後多顯者

康熙志參縣志

馬快字汝勵號東廬廣平人父政官山西定襄縣訓導善誘後進快天資警悟潛心理學治易書詩三經嘉靖二十二年以葩經領鄉薦甲辰成進士初授山東長清令居官廉平務伸冤抑邑有大豪怙勢橫里中快數豪罪狀置於法民懽然稱快調平遙合剛方耿介不避權豪大計入覲士大夫爭以金繒為贈悉麾之不受解組歸行李蕭然乃結廬於僻靜之境博綜墳典探六經奧旨訂諸儒異同之辨凡易傳及諸解節要手錄成書獨

得者居多

廣平志

賈光祖字克孝廣平人嘉靖二十二年舉人任陽城令陽城煩劇刁獍成風光祖至則破格興除朞月而立效時有賈父母真父母之頌會邑大豪盧姓久爲民蠹光祖廉其狀寘法亡貫豪竟賄當道造訛謗光祖遂挂冠而歸

廣平志

張成教邯鄲人嘉靖二十二年舉人初知日照縣改大同府學教授晉鞏昌府通判居官耿介不事逢迎致仕後肆志詩書下筆輒數千言不以老而廢也纂修邑乘所著洛南詩文集藏於家

邯鄲志

王邦直

舊志作植

字國甯磁州人人生而駢脅有神力稱王千斤弱冠補州學生食廩餼非所好也乃學騎射窮韜略

日擐甲合左右奉弓刀侍父潺爲府谷合邦直自府谷歸遇寇於道發一矢不中中石石爲之泐寇取矢視如枉駭焉遂不敢近嘉靖二十一年邊警頗急詔舉才勇於是兵科都給事中戴夢柱薦邦直於朝命詣大同總督侍郎翁萬達與語甚歡以國士遇之解衣授食分坐談邊邦直亦願以肝膽相歸踰年謀報虜將入寇萬達使邦直同參將張鳳率義勇五百人出塞外覘視抵鵝鴿峪窺山上賊數十騎往來邦直感而擊之無孑遺者

復視山下賊百餘奔焉邦直與鳳謀可悉取殲之後者
曰將軍功奇矣可勿逞竟飛騎以往踰谷口數里忽至
大陸溝中伏兵約三萬餘騎列兩大翼而陣邦直激眾
奮勇以矢石急擊而身自引弓射殺賊首賊眾忿合圍
七重戰七日夜邦直斬虜千餘級會天雨雪矢食俱盡
邦直潰圍而出檢義兵從者惟王國順一人歎曰吾與
汝等本欲立功沙漠以報主恩不意眾寡不敵損亡殆
盡且鳳已亡惟吾獨存恥也異日何顏面見軍門邪遂
策馬復入賊營力竭被害虜固壯邦直環其屍相視嚙
指翌日遂引退我軍輿其屍而歸既而有自虜中還者

云諸部落皆悲泣謂是役死傷不勝計自此虜數年不
復敢犯諸鎮士吏知與不知皆爲盡哀萬達親爲文祭
之上疏請錄卹又擬張世忠故事乞諡表爲立祠與張
鳳並祀而以李尙倫等八人附焉詔贈邦直都指揮僉
事建祠以祀仍廕子化熙爲潞安衛正千戶世襲明史列傳
王化熙邦直子幼卽攻苦讀書弱冠食廩餼襲父廕累
遷山東參將擒賊渠李應乾賜一品服色隆慶三年禮
科給事中李己疏薦遂超遷前軍都督晉兩廣總兵官
挂征蠻將軍印萬厯初賜蟒服玉帶晉光祿大夫服官
凡四十年蒙恩賚二十次卒賜葬祭遭際之亨蓋武臣

所罕云

磁州志

申中清字友石永年人嘉靖二十五年舉人博學善屬文清脫爽健任莒州知州未幾歸徜徉林壑杯觴吟詠無虛日弟中道嘉靖四十年舉人里稱二申

永年志

梁桐號竹坪肥鄉人嘉靖丙午舉人出李攀龍之門知博興縣有廉惠聲致仕家居尤肆力於古文辭著有潛

軒集子遜號樵山訓導衡水以清貧卒

肥鄉志

李珍字待聘廣平人嘉靖丙午舉人授陝西洵陽縣令專務以德化民以禮變俗以儉維風節省里差裁革常例當事者尚風力而珍守循良軌三尺忤當道改調簡

僻遂棄不就澹泊清修悠然自得有古人風

廣平志

馬呈書字汝緯廣平人領嘉靖二十五年鄉薦歷知南召孝義大同等縣罔不稱職升大同府同知單車出塞邊陲以甯遷南京戶部員外郎轉浙江司郎中復知大

同府

廣平志

鎮撫有方尤加意學校倥偬戎馬間絃誦時

聞

山西志

當道交薦前後凡十六疏上六賜金幣擢福建

鹽運使致仕題其堂曰卧雲丙戌春上遣使賜金幣時家居五年矣人以爲曠典

舊志

劉錫字德純號鈍菴雞澤人弱冠登嘉靖二十六年進士授庶吉士尋擢御史巡按山東墨吏望風解綬以忤

權要出知紹興府力革溺女齋僧諸弊越俗苦奩資競
侈輒不舉女錫為更定禮制其俗遂變倭寇海濱錫督
兵屢有俘馘世宗賜金會趙文華出視師錫不為屈竟
得譴罷官著有文集行世

雞澤志參
康熙志

張應麒肥鄉人父悅年十二入郡庠廷試授臨朐訓導
以經術課士端方耿直無愧古人應麒歲貢生授潞安
府通判嘉靖丁未從撫臣楊守謙議以偏頭老營二所
餘地一千九百頃委之屯種內省京運外嚴防守應麒
悉心經畫獲芻粟無算恩賜白鏹擢同知卒

肥鄉志

楊化字樂川永年人嘉靖二十八年舉人知泗州築石

隄一萬八千丈捍水護城遷河南僉事以卓異賜金幣
致政歸與鄉飲者二十載年八十卒

康熙志

張學顏字子愚肥鄉人生九月失母事繼母以孝聞親
喪廬墓有白雀來巢登嘉靖三十二年進士由曲沃知
縣入為工科給事中遷山西參議以總督江東劾去官
事白遷永平兵備副使再調薊州隆慶五年遼撫李秋
免大學士高拱欲用學顏或疑之拱曰張生卓犖個儻
人未之識也置諸盤錯利器當見侍郎魏學會後至拱
迎問曰遼撫誰可者學會思良久曰張學顏可拱喜曰
得之矣遂以其名上進右僉都御史巡撫遼東鎮邊長

二千餘里三面鄰敵官軍七萬二千自嘉靖戊午大饑士馬逃故者三之二前撫王之誥魏學會相繼綏輯未復全盛之半繼以荒旱餓莩枕籍學顏首請賑恤實軍伍招流移治甲仗市戰馬信賞罰黜懦將數人創平陽堡以通兩河移遊擊於正安堡以衛鎮城戰守具悉就經畫大將李成梁敢力戰深入而學顏則以收保爲完策敵至無所亡失敵退備如初公私力完漸復其舊十一月與成梁破土蠻卓山進右副都御史明年春土蠻謀入寇聞有備而止奸民闌出海上踞三十六島閱視侍郎汪道昆議緝捕學顏謂緝捕非便命李成梁按兵

海上示將加誅別遣使招諭許免差役未半載招還四千四百餘口積患以消秋建州都督王杲以索降人不得入掠撫順守將賈汝翼詰責之杲益憾約諸部爲寇副總兵趙完責汝翼啟學顏奏曰汝翼卻杲饋遺懲其違抗實伸國威苟緣此罷斥是進退邊將皆敵主之矣臣謂宜諭王杲送還俘掠否則調兵剿殺毋事姑息以蓄禍趙完懼餽金貂學顏發之詔逮完而宣諭王杲如學顏策杲懼十二月約海西王台送俘獲就款學顏因而撫之萬厯初李成梁議移孤山堡於張其哈佃移險山五堡於寬佃長佃雙墩長領散等皆據膏腴扼要

害而邊人苦遠役出怨言工甫興王杲復犯邊巡按御史亟請罷役學顏不可曰如此則示弱也即日巡塞上撫定王兀堂諸部聽於所在貿易卒築寬佃斥地二百餘里於是撫順以北清河以南皆遵約束明年冬發兵誅王杲大破之追奔至紅力寨張居正第學顏功在總督楊兆上加兵部侍郎五年夏土蠻大集諸部犯錦州要求封王學顏以正言卻之冬召爲戎政侍郎加右都御史未受代而土蠻犯遼瀋開原明年正月破敵劈山殺其長阿丑台等五人學顏遂還部踰年拜戶部尙書時張居正當國以學顏精心計深倚任之十一年四月

改兵部尙書時方興內操選內豎二千人雜廝養訓練發太僕寺馬三千給之學顏執不與馬又請停內操皆不聽其年秋車駕自山陵還學顏上疏極諫宦豎皆切齒爲蜚語中傷神宗察知之詰責主使者學顏得免然亦不能用也考滿加太子少保雲南岳鳳罕虔平進太子太保時張居正旣歿學顏累疏乞休許致仕後二十六年卒於家贈太保

明史
列傳

周京字在鎬永年人嘉靖三十二年進士授潞安府推官擢禮科給事中振武營兵變京先諭散之乃疏請誅首禍者營兵感而畏之出爲湖廣參議廣西巨寇馬五

等將趣永州為亂京設伏擒之因散其餘黨遷西甯副

使陞太僕寺卿卒

永年志
參舊志

王一鶚字子薦曲周人父世爵任理問開屯田辨冤獄
以才幹稱一鶚垂髫登嘉靖三十二年進士請歸娶詔
賜文錦才識敏練長於用兵任南京職方主事值兵變
單騎往諭眾悉解散授建甯府有倭警一鶚巡城激勵
士卒皆感憤城賴以全累遷至薊遼總督籌畫皆中機
宜邊境甯謐晉兵部尚書肅清積弊海內晏如加太子
太保卒賜祭葬

畿輔通志
參康熙志

牛山木號養菴曲周人嘉靖三十二年進士知萊陽縣

邑多大猾以次置於法器俗一變蠲賦開荒頌聲四達
升戶部郎督儲代州值有邊警難民數千環城下求入
不得山木言於撫臣納之全活甚眾歷遷口北道僉事

罷歸

畿輔通志
參康熙志

申佐字懋良永年人嘉靖三十五年進士授岳州府推
官值狼兵劫擾佐捕治首惡眾皆誓服行取浙江道御
史有直聲出為山東僉事升陝西參議以平寇功升陽
和兵備參政俺答孫把汗那吉來降總督王崇古納之
而其子辛愛

舊志作
台吉

持兩端率眾掩至大同佐贊崇古

調畫有功賜金幣升右僉都御史巡撫大同致政歸居

溢水上築釣臺以自適十餘年卒賜祭葬

畿輔通志

楊進道號克齋曲周人嘉靖三十五年進士初知海鹽縣值倭亂加意招徠士民復業邑人立祠祀之遷戶部郎擢陝西延綏僉事嚴戰守之備邊境帖然嚴嵩遣使索虎皮千張進道拒不應遂致仕嵩敗補廣西僉事未

任卒

康熙志

李齊芳字見甫成安人嘉靖三十五年進士學詩於李攀龍知歷城縣時嚴嵩亂政縣令每阿附之以博臺諫齊芳絕不與通歷五載乃遷戶部主事世宗崩穆宗未卽位奄人傳旨除官中外駭愕而無敢言者齊芳上疏

語甚激烈上得疏覽不釋手中貴銜之謫同州佐尋移

衢州時防礦兵數千以知府給餉遲激變知府匿不出

齊芳往平之官終漢中府詩文高古爲斥邛冠冕有夢

寤集行世

畿輔通志參舊志

鄭守道字子中永年人嘉靖三十七年舉人知臨清州精勤廉斷豪猾斂迹臨清當水陸之衝使客往來者絕無儲侍贈遺省商民費無算以勞瘁卒於官孫之望舉

人

康熙志

田應揚雞澤人弼之弟嘉靖三十七年舉人令廣昌民多尙武不知耕織勤董教之擢忻州牧俗健訟而通糧

勸諭久之訟漸息國課亦早完再遷萊州同知進襄府長史輔導稱職三年加四品服俸致仕

雞澤志

李堯德永年人嘉靖三十八年進士任施州知州有善政歷官陝西巡撫僉都御史賞罰公允邊陲以甯

永年志

蔡國熙字春臺永年人嘉靖三十八年進士授戶部主事督餉延甯隨事清刷夙弊悉蠲兵民歡洽

陝西通志建朔

方書院與諸生日講習其中邊鄙土風一變秩滿出知蘇州府減織造毀淫祠建書院濬河渠省耕勸課政為

天下第一入覲賜宴朝野稱循吏者必曰蔡蘇州云會其父廷光貽書誡以明哲見幾遂引疾吳人泣送於江

濱旋丁外艱服闋擢蘇州觀察副使初國熙守蘇時徐

階子璠遣奴白事奴無禮甚國熙庭朴之未幾以事過松江徐氏諸奴率數十艇環舟而譟松江府出解乃已

至是階謝政里居或訐璠諸不法事巡按御史囑國熙鞫讞事多實致璠及羣奴於獄張居正走書為解國熙

卒按如法璠黨遂揚言國熙修譟舟之憾且為新鄭報復新鄭者故相高拱國熙師也與階素有隙執政乃以

國熙提學山西謝歸卒三吳具公揭辯前事且盛稱治吳功得祀學宮國熙少究心於性命之學官戶部時與

羅近溪耿楚侗諸公相劘切學以盡己為宗旨以反己

爲工夫歸里後大名道王世貞建坊於所居曰敦廉里

子允之萬厯庚子舉人知江浦縣

畿輔通志
參康熙志

陳于陞號蓋齋曲周人嘉靖三十八年進士授慶陽推

官擢禮部郎爲東宮講官甚見親重常書恭慎及經幄

效勤字賜之晉太常卿以忤張居正罷歸居正敗起右

副都御史尋以侍郎督漕運卻例金十三萬升戶部尙

書以奉表過里卒囊中俸餘八金而已賜祭葬贈太子

太保予廕弟子階字和齋進士厯官懷隆兵備道

畿輔通志

志參康熙志

蔡可教字孟受成安人性嚴重視瞻毋回爲諸生時憲

使李公館之邸與其子相切劘得嘉蔬果必攜歸以奉

祖祖未食不敢嘗李公以陸績日之嘉靖三十八年成

進士時嚴嵩鄉人雷曾爲廣平通判或勸可教因曾見

嵩則可得京職可教謝之授南陽推官有知州某以墨

敗其弟方在諫垣囑巡撫用輕典可教卒按如法以是

不得行取久之晉民部郎出爲德安府以治行最擢陝

西副使兵備潼關以裁革驛遞忤當事謫山東僉事旋

復爲遼海兵備御史劉臺以劾張居正被逮官屬不敢

過問可教獨往視且厚贈緹騎囑善護臺居正銜之左

遷行太僕寺丞未幾以考功黜卒於家弟可行爲梓花

芻吟可立為梓焚遺集行世

畿輔通志

蔡可賢字仲聞可教弟嘉靖四十一年登進士由戶部主事歷郎中出為太原知府時石州新破瘡痍載途可賢委曲撫綏能聲卓著擢霸州兵備道旋調岢嵐道時俺答因互市數要盟會他鎮使無敢應者可賢單騎會諸紅門裁定馬價省費數千金以忤當道謝病歸壬辰哮劉殺巡撫據甯夏以叛朝廷用樞臣議召可賢贊畫行間屢出奇計事平升一級命飭兵遼東數月以內艱歸可賢所至雖動多齟齬未究厥施然海內士人無問識與不識皆仰其才名子應龍官中書

畿輔通志參康熙志

郭宗賢字楨甫邯鄲人嘉靖四十年經魁知汝水縣始用甌石甃城垣民立祠祀之調延津行取雲南道御史條陳四事曰兼名實嚴公私酌用舍審進退權要憚之出為臨鞏兵備道遇敵於和政驛或請退保臨洮叱曰吾視此城為存亡有言去者斬督眾發礮擊賊賊遁去擢雲南按察司興利除弊軍民德之亦勒石建祠晉太僕寺少卿致仕卒於家祀鄉賢祠子佳鎮進士

畿輔通志

馬明謨字君獻號可堂廣平人父人慈官隰州學正以孝稱明謨嘉靖四十一年成進士初授鎮江推官平反有聲遷御史按江西福建廣東廣西糧儲疏陳八事皆

允行四省稱便海寇犯嶺西

康熙志作嶺南

守者失備禦明謨

上疏彈劾語甚激切用是撻忌謫處州府發奸摘伏有

神明稱忌者復以風聞論劾明謨即日就道行李蕭然

諸饋贐者皆峻卻之士民欲叩闈明謨止之曰是適重

吾禍也遂歸明謨為諸生時其父病隰州學正署明謨

家居夜忽忽不樂未明求衣一日行二百里省父於隰

父在牀已先知之輒呼曰兒來矣人咸異之

康熙志參通志縣志

張國彥字熙載邯鄲人父繡早孤事祖母楊母趙至孝

朝廷命禮官旌之國彥登嘉靖四十一年進士知襄陵

縣時久旱步行數十里至龍祠祈禱父老憫其勞國彥

曰一身何足恤獨吾民荒歉可念耳民立祠祀之擢給

事中疏請訓儲罷買珠並見採納累遷都御史巡撫鄖

陽連疏極諫開礦寢其事協理兵部尚書時驛遞疲敝

奏設背包軍馬令畿民遣戍者還籍充之軍書無誤而

民尤感德洮河之變有策畫功加太子少保賜飛魚服

卒贈太子太保賜祭葬子我繼我繩萬曆十年同領鄉

薦我繼知湯陰賑災課士我繩以戶部郎司餉延甯適

歲大祲借浮賞十八萬濟急多方處給惠洽三軍建祠

以祀我續萬曆八年進士歷官戶部尚書

畿輔通志參康熙志山

西通志

吳善言字子遠成安人嘉靖四十一年進士歷工部戶部主事轉員外郎督餉上谷積羨金數萬悉註冊存庫轉郎中出為蘇州府時方岳郡守卓異者二十五人善言為治行第一賜金幣筵宴擢陝西右參政累遷至浙江巡撫時政府議汰餉忌者因是以激兵變及入署善言橐中祇五十金耳一切供張均無異寒士乃各悔恨解散而善言竟罷官歸子維東萬曆甲辰進士官漢中兵備道以忤巡撫致仕

畿輔通志

秦邦彥字子美曲周人嘉靖四十三年舉人早歲失怙事母以孝聞直質無飾言初知磁州漳水泛溢害旁郡

邑築三臺口以障之瀕河獲免陷溺他政績率類此終員外郎

曲周志

陳忠言字子敬成安人嘉靖四十三年領鄉薦初知河南密縣有異政密人祀之歷任山東衡府審理正為世子師以輔道功王賜扁以旌兄有遺子在抱養育之如己出居鄉不入公庭尤為人所推重

成安志

霍維蓋曲周人嘉靖四十四年進士萬曆間分巡冀南道以正人心移風俗為急務人咸以古君子稱之

山西通志

秦吉士字子敬曲周人嘉靖四十四年進士初授甯陽知縣考績治平第一徵為吏部主事任銓政五年歷員

外晉郎中乙亥參湖廣政戊寅按察山西詳慎平允積獄無留牘爲布政餉軍鉅萬刻期辦而民不驚丁艱去

卒年五十

陳于陞撰墓志

岳維華曲周人嘉靖四十四年進士官臨洮府知府時火酋入犯人心危懼維華躬自登城督率守禦復遣民兵相機擊之城賴以全

甘肅通志

李己字子復磁州人嘉靖四十四年進士除太常博士擢禮科給事中隆慶中頻詔戶部有所徵索尙書劉體乾輒執奏己每助之以是積失帝意及爭珍寶事遂得禍未幾刑科給事中舒化等請釋己刑部尙書葛守禮

等因言朝審時重囚情可矜疑者咸得未減己及內犯張恩等十人讞未定不列朝審中苟瘕死犴狴將累深仁帝乃釋己恩等繫如故神宗立薦起兵科都給事中奏言陛下初基弊端盡去傳奉一事豈可尙踵故常內臣卽有勤勞當優以金帛名器所在不容濫設帝嘉納之御史胡孝建言得罪己首論救尋劾兵部尙書譚綸去取邊將不當平江伯陳王謨罪發復黃緣出鎮湖廣己力爭得寢擢順天府丞遷大理右少卿疏請改父母誥命日已暮逼禁門守者投入帝怒謫常州同知初己與陳吾德竝敢言己尤以直著後爲南京考功郎中九

年京察擢南京尙寶卿三遷右僉都御史巡撫保定六

府踰年罷歸卒

明史陳吾德傳

范崗邯鄲人嘉靖間知潼關縣賑救凍餒招撫流亡全

活甚衆

陝西通志

安謙字汝光成安人嘉靖中進士初知樂安縣調吳縣

吳故多豪猾有長役別役雜供億萬內外交困謙調停

其賦吳人稱便時被倭蹂躪謙繕城垣修橋梁百廢俱

舉升南京戶部主事以兵變罷歸年甫三十屢薦不出

康熙志參

江南通志

程光漢字斗賓永年人歲貢生博學能文任諸城訓導

山左諸邑志多經裁定上官薦其才徵修國史病卒於

家孫調羹萬曆三十七年舉人任卽墨縣知縣

永年志

李應乾字德剛永年人嘉靖中爲諸生力究性命之學

行已有律度以春秋授鄉人從遊者多掇科第應乾竟

以諸生終

永年志

康守愚字哲夫雞澤人嘉靖中以貢生授南宮訓導端

範潔己殷爲化導一時科第稱盛遷趙府長史方嚴自

持殫心匡救

雞澤志

王汲字引之雞澤人以貢生任解州同知天性孝友爲

諸生時卽陳情當道以雪父冤父母沒廬墓六載有孝

感異徵郭瞻孔贈之以詩同上

趙濂天雞澤人性至孝母病癱不能起濂與妻侍養五年無倦一日見母溺器不潔呼家眾痛斥之曰是嫌我母也躬自滌之知縣周文定扁其門曰孝子同上

李竽曲周人嘉靖間倭寇猖獗督府胡公署中軍指揮每戰先登當者輒辟易後以眾寡不敵軍覆被執奮呼曰丈夫不能殺奴報國死耳復何言倭奴支解之曲周志

宋學易永年拔貢生早歲失恃與兄學道廬墓於漆泉寺廢視聽絕思慮泣血三年李德性撰文記其事後任鞏昌府通判祀鞏昌名宦祠永年志

張宗孔號仰山肥鄉人以歲貢生授保定訓導至則與郡守爭謁見之禮不合挂冠歸而所學以此大進日與門弟子研討性命晚年走京師謁執政陳民生之凋弊斥律令之煩苛撫軍張梁水壯其言與人交尤能解紛排難卒年九十八肥鄉志

張承祚肥鄉人學顏子以恩廕授延安同知伉直忤中貴意降濟南通判督餉遼東劾稅瑞高淮不報淮憤甚欲殺之淮卒擢歸德同知引疾歸與成安喬芳塘為詩友唱和終身著有春秋歸正書世麟堂文集行世同上
陰鶴字子和廣平人由嘉靖歲貢任山西華亭令陞秦

州知州天性孝友巡臺旌其門曰竭力事親公論可徵乎師友因心愛兄謙讓不專於貨財其愛民則德政有碑去思有記遺愛有錄肖祀有祠蓋實錄云

廣平志

申德字善政廣平人嘉靖間膺歲薦初授樂陵縣丞陞沂水知縣署中清苦如布素妻司氏紡績不輟致仕歸夫耕婦織與微時無異不干公廷邑令求一見不可得

同上

馬綽字汝謙廣平人嘉靖間初授代州同知歷署岢嵐繁峙所在政治有聲會繁峙不靖綽嚴督禦備且襲奪所掠牛馬千五百匹繁峙人深德焉當道旌其功尋致

任同上

都祁字景哲廣平人由歲貢授河南開封府通判河南舊多盜而祁捕獲有方地方靜謐陞山西隰州知州州俗刁悍祁威以嚴法而復撫之刁悍屏迹

同上

吳來清河人嘉靖中有賊入境來率兵戰死妻王氏亦以節稱有司表其門

舊志

李謙成安人嘉靖末以明經任青州府檢校歸田後遇歲不登卽輸銀四百兩賑給一鄉設義學里中擇同學端慎者爲師以訓其鄉之子弟成材甚衆

成安志

唐若彝字化夫成安人父珍宰陵川靜樂有政聲若彝

少有文名以恩選入貢成均拜黎城丞問民疾苦以循吏自期有權思和者坐耗官錢被囚欲鬻女以償彝貸以俸而還其女民有坐人命誣誤司理欲得賄不應假手於彝彝知其誣曰吾不以人命媚上官竟出其罪未幾司理思羅織以罪彝遂投牒歸士民泣送者萬人勒碑建祠以奉之

成安志

重修廣平府志卷五十一

列傳五 明下

李廷華字對溪永年人隆慶元年舉人知新蔡縣以清惠稱陞鄖陽府通判致仕生平好為詩古文詞於宦情甚淡里居卻掃吟嘯之外都無所與

永年志

袁魁字子選成安人年二十登隆慶二年進士知陽曲縣聽斷若老吏晉王強占民田多役丁夫有司不敢問魁逐一查覈清出民田二萬畝民夫三百名民困頓蘇貢院號舍屢火魁請於上官發以甄石興學課士賑恤貧寒有門役某故業儒以貧廢魁異其狀貌試以文理

可觀遂遣歸讀書月給粟周之後竟成進士魁性剛方不能俯仰流俗竟以此取忌罷歸弟瑰以明經官東郡

有聲

康熙志參
畿輔通志

賈待問字學叔威縣人隆慶二年進士知咸甯縣當省會案牘山積迎刃而解又清兼并之稅五千餘頃治聲流聞擢給事中糾劾不畏彊禦再疏論劾馮瑞聲震中外出守懷慶城西沁水爲患疏而濬之築長隄以障其衝人稱爲賈公隄改守松江松中倭寇日深困於兵食爲裁冗役請帑金代墾境內閒田累遷湖廣布政拜都察院右僉都御史巡撫南贛疏通鹽法巡撫甘肅值火

酋套虜合寇莽捏二川設伏擒斬無算招降番族八百有奇虜失右臂改撫陝西時當甯夏兵變歲復不稔多方拊噢稍得蘇息是秋防虜移駐河湟調度遮擊斬首二百級招降六千餘虜西逸詔晉右都御史巡撫如故松山在河西塞外爲羌虜要地小酋賓盤踞三十餘年待問會制府集七路之師分道出擊恢復疆土羌虜道絕晉兵部尙書巡撫如故久之火酋復入寇遣將戰於節子岡破之進太子少保居陝八年德教浹洽稅使梁永恣其僭從剝民財物多殺無辜上疏劾狀逮其人付之重典梁請於四鎮稅馬待問亟疏陳其不可遂寢以

勞瘁成疾連章乞骸骨不許卒於官賜葬祭贈太子太保子同芳授理刑官天啟中告養家居屢徵不起

陝西通志

參威縣志

畿輔人物考

賈儲芳待問之姪以廕任臨清鎮撫有巨璫視師謁見

不為屈辭歸戊寅城破死

康熙志

賈傳芳字聚堂威縣人以廕授廣東高州府別駕復補

青州有異政擢膠州知州時山左教匪倡亂所在蜂起

傳芳潛訪為首姓名居址計取其渠魁而脅從者悉放

歸農全活以萬計

威縣志

趙應斗字星野雞澤人以恩例選入太學孝奉父母服

喪哀毀骨立廬墓二年授浮山縣三冬無雪步禱南郊

三日雪深數尺夏旱為文自責拜烈日下須臾雨集浮

山人戴之如慈母立祠祀焉子貺萬歷庚子舉人劄諸

生勲以恩例入太學

雞澤志

宋范字希范永年人博學尤邃於易隆慶五年成進士

選庶吉士遷御史按甘肅時蕃戎剽掠階州督撫將吏

逗撓不前范疏劾之削奪有差遷湖廣僉事時宣大督

撫請頒鐵鍋農器於邊地當事者阿張居正意允行范

疏請遵祖禁稽成敗核功罪反復數千言後皆驗楚王

妃弟椎埋為奸居正右之將滅死范覆駁當抵狀忤居

正謝病歸萬曆辛丑大饑鬻田百畝以助賑萬曆二十

七年卒詔進中順大夫 畿輔通志

苗淳然字實齋曲周人隆慶五年進士為禮部主事值

神宗時舉朝爭建儲而朝鮮表請廢長立次淳然慮惑

朝聽焚其表不以聞宗伯惶懼及上問具以實對上頷

之遷陝西參政劾貪墨吏數人詞及吏部巡撫直聲震

一時終太僕寺少卿 康熙志參 畿輔通志

姚三讓字益軒永年人萬曆二年進士知祁門縣有政

聲擢御史巡鹽河東量高下別亢潦為之盱眙以時轉

運漕政賴之按陝西務大體不為瑣屑而諸王國人皆

屏氣相下值歲荒百計撫恤饑而不害再按應天入掌

河南道以爭建儲被黜泰昌中追贈光祿寺少卿 畿輔通志

志參陝西通志

李杜字雙溪永年人萬曆二年進士官戶部主事出守

潞安府寬厚明決張弛得宜賑荒除奸民懷其德遷神

木兵備道時莊明二部數入犯杜飭武備設間諜剋期

興師二部遂還所掠乞奉約束晉按察使卒於官子春

萼萬曆己酉舉人知新泰縣遷忠州定石柱土官之亂

春秦天啟辛未進士官御史嚴正不阿出按山東自投

劾去官甲申陷流寇自經於宜溝驛 康熙志參山西通志 畿輔通志

李春華字秀林永年人杜之子以孝友稱父歿撫兩幼弟甚篤後皆顯貴春華好施與至賣田拯親友急以為樂後任洧川主簿有惠政

永年志

牛維炳字承菴曲周人山木子萬歷二年進士官給事中疏請勤學視政停選宮女皆嘉納之真人張國祥乞修壇廟兩宮發銀三萬兩已出國門以維炳疏追還陝西旱維炳以封王入境見餓殍枕籍馳疏請賑銀五十萬差官賑濟全活甚眾仕至徽甯道副使

曲周志參康熙志

馬壯字汝吉邯鄲人萬歷四年舉人除博興令政簡刑清民戴之如慈母境有清河烏河害甚劇捐俸築隄水

患遂平民德之號馬公隄因與監司牴牾告歸里居膺賓賢之典者三十餘年卒年七十九

邯鄲志

王世揚字孝甫廣平人允武孫萬歷五年進士為行人三銜命名藩所至卻餽遺詢謠俗識者知其有遠志擢御史巡視陝西茶馬值歲祲疏留賑又蠲贖銀二千金賑之是歲秦饑而不害甘肅故以蕃為蔽而蕃屢與狄鬩世揚悉心調劑烽燧頓銷歲增馱驥四百七十省椿棚金五千餘復奉命按浙議減御衣織造三之一按中州行視河隄俾積埽厚餼豁其虛賦使沿河流民占田自種而河亦安故道梁州饑檄泗亳餘粟移賑之還遷

大理丞轉少卿巡視延綏陳善後十事世揚故諳九塞情形所至閱實按營壘屯政齟法赫然一振晉少卿擢右僉都撫上谷初廷議撫史車二酋安免誘史酋依帳下與為豕突三歲苦邊患世揚令招撫西單于因是縛獻史酋眾議俘諸廟世揚矍然曰是故吾屬也移書大司馬復上疏列狀還史酋所部而諸屬夷謹然曰王公真卵翼我乃委心焉癸巳虜大饑關市馬不如額乃以額馬十折皮張馬一虜權如更生而省歲市二萬有奇東西陲宴然省金繒鉅萬加右副都晉兵部右侍郎總督宣大諸邊部酋皆嚙指稽角奉約束獨安免怏怏復

壁白馬關世揚曰會須一大創而後得安寢檄各路出塞前後擒斬五百餘級奪獲馬牛羊無算安免懼叩關悔罪諸酋均乞款尋召為少司馬次年甘肅告捷晉兵部尚書念母春秋高乞省覲至四不允詔中使勞問年六十丁母艱泣然如孺慕卒贈太保

畿輔人物考參通志

賈熙載字亮所雞澤人萬曆七年領鄉薦知白水縣以抗直忤宦官張忠改夏縣清節自持書帖字於座側以自警曰誓為黎庶驅驅虎兇與兒孫作馬牛歷遷廬州同知引年歸建義塾橋梁義冢善舉甚多卒祀鄉賢祠從弟熙績字懋所進士官至鎮江府

畿輔通志參康熙志

杜縻字爵齋秉彝次子萬曆八年進士性峭直初令金鄉縣調厯城所至有聲選南京兵科給事中劾巨璫張鯨謫長興縣丞遷洧川知縣陞淮安同知旋陞知府稅璫有陳增者多以白徒爲委官攘奪商民一郡駭擾縻揭報漕撫奏逮之諸璫斂手終武德道副使

永年志

唐謙吉字伯益曲周人萬曆十年舉人知石首縣築隄禦水民德之擢解州知州值歲荒牒請賑貸多所全活厯升刑部郎當魏璫羅織之時用法平恕雖忤璫不顧也以鄖陽知府致仕歸田廬不增兄弟友愛年六十猶

共爨

畿輔通志
參康熙志

盧大中字權南永年人萬曆十一年進士知武城縣有囚申孝思以誣陷大辟大中爲力辯釋之擢南京給事中條上營務五事以軍政事回籍泰昌中起用厯太常卿當魏璫時孤峭自持淹滯三年遷南京工部侍郎詔以工部尙書致仕年八十有一卒加太子太保予葬祭祀鄉賢祠弟大謨舉人官同知大順進士守蘇州勦倭寇有功終福建鹽運使子愰允貢生平度州同城破死從子恢允舉人平陽同知值流寇亂疏留久任防河愜允舉人按院舉德行第一

同上

李德性字山泉永年人萬曆十三年舉人精經學知略

陽儀封二縣有政聲子韞秀舉人官戶部主事孫仲熊
進士官御史歷湖廣僉事有文名典試陝西山東稱得

士康熙志

趙夢麟字季兆永年人博學能詩萬曆十四年進士初
知儀真縣調吳江裁定催科漕兌水利三事擢兵部主
事會甯夏討哱劉亂贊畫督府建謀決河絕賊餉道收
復四十七城後謫知岢嵐縣甓崞城築墩堡於雁門等
處轉遼陽推官定山東金妖之變收撫七千人殲厥渠
魁調彰德府推官卒同上

蓋國士字居衡永年人父光宙陳州府知府國士萬曆

十四年進士任鳳陽府推官嘗覆勘大獄同訊者將爲
賂撓國士與誓城隍神乃論如法累官吏部郎抑請託

拔寒峻銓政一新畿輔通志

宋師程字定門永年人萬曆十七年進士任歸德府推
官擢戶部主事權臨清爲平準法參用銀鈔貨不以改
折困商人皆德之轉郎中督倉德州令解納自爲量兌
倉儲以裕出守嘉興舉卓異遷晉陽兵備道卒於官畿

輔通志參
康熙志

常守信字可行磁州人萬曆十七年進士常備兵潼關
值歲大祲力請上官將潼倉本色折銀六錢復捐各官

俸銀之半賑濟遷湖廣江防副使士民泣涕如雨制行
純篤奉庶母如生母遇流離困乏者輒解衣推食行路
皆感泣誦焉

舊志參陝西通志

張懋忠字聖標肥鄉人學顏孫以廕襲錦衣衛千戶萬
曆十七年以武探花及第加升指揮同知臺臣官應震
等疏薦團練京班軍製雙輪戰車稱旨會魏瑞禍起為
同官田爾耕所構謂為東林羽翼詔繫獄崇禎卽位釋
補原官督修昭定慶三陵進宮保上柱國引年予告卒
於京生平手不釋卷文名大著所交遊皆海內鉅儒

康熙志

康熙

聶雲翰字搏羽曲周人萬曆二十年進士知崑山縣公
廉強直輕徭稅懲火葬風俗一變時將編賦役雲翰以
為非戶清則田不出非田出則役不均乃總戶履畝而
校之造冊定上中下三等賦復督修城垣丈尺工費能
運諸指掌間人以為神擢兵部主事貧不能治裝崑人
醵金為贖皆麾去改禮部會朝鮮奏廢長立少朝臣多
附和之雲翰正色力陳大義數上封事忤權相未見施
行時論惜之

康熙志參江南通志

冀光祚字貽允邯鄲人萬曆二十年進士任夏津縣多
惠政晉刑部郎出知寶慶府清直著聲音沔陽副使聞

母疾卽告歸兩臺疏未發光祚曰甯挂冠不忍不伺吾母瞑目也竟馳還官至雲南按察使廉明執法卒於官

邯鄲志

楊性魯字鈍卿磁州人萬曆二十年進士天性孝友襟懷豁達任高平令以不獲上官意罷歸日以著書爲事尤長於詩凡天時人事之變無不以詩紀之時論比之

詩史

舊志

杜汝亮永年人廓之子萬曆二十二年舉人事繼母申氏孝常坐一小閣篝燈夜讀母不命之寢不敢寢母色不豫卽長跪竟日母悅乃已除雒南縣知縣攝商州知

州皆有能名

永年志

胡應召字靖宇肥鄉人萬曆甲午舉人知霑化縣絕逢迎行勸課慈祥愷悌不忍以刑罰加民謫臨胸教諭臨胸主簿楊某廉吏也以不得邑宰歡坐勘逮妻子行乞流落不得歸應召雪其寃且出金代完懸坐之贓人義之補河曲令左遷晉府審理致政歸卒年八十

肥鄉志

張師孟字泰巖曲周人萬曆二十二年進士知山陽縣當水陸之衝長才肆應興革利弊綽有餘暇擢御史巡鹽兩浙清廉自矢羨金悉留爲公費晉太僕寺少卿卒於官

康熙志

郭佳鎮字重明邯鄲人宗賢子萬曆二十六年進士知

確山縣調壽光鋤強字弱恩威兼濟擢戶部主事權河

西務蠲額外羨金數千兩督儲遼餉較準平衡洞革夙

弊歷官武德道時福王之國河驛騷擾佳鎮不避斧鉞

一切冗費盡裁官民稱便尋請告歸里

康熙志

王家瑞成安人萬曆二十六年進士知咸陽縣不畏權

焰力阻開礦民感恩立祠

陝西通志 參成安志

聶雲翹字澹心曲周人雲翰弟萬曆二十八年舉於鄉

官魏縣教諭遷國學魏瑞亂政列名公疏彈之以工部

郎中差督中河稅不加羨凡應入私囊者悉以助修築

因病回籍潛心性命之學浩然有得會有警書見危致

命四字於壁積薪樓下曰城陷則焚之屢薦不起年七

十卒

康熙志

賀君恩號斗墟肥鄉人萬曆三十年舉人家貧事母孝

教授生徒以供菽水初官玉田教諭晉國子監轉南京

戶部司務司務故無管差例大司農以其精敏廉幹要

差悉倚任之君恩殫力經畫不避勞怨歷遷本部郎中

卒於官

舊志參 康熙志

劉九成字子韶曲周人萬曆三十年舉人官遷安教諭

擢岢嵐知州值歲歉多方撫輯不施鞭朴時軍興需餉

部牒急徵九成曰吾終不以萬命易一官署下考投劾

去撫庶弟有恩終身不異爨

畿輔通志 參康熙志

康應乾字一之雞澤人萬厯甲辰進士

案選舉 作辛丑

初知陳

州俗好訟不務農應乾善懲之民向化力田更加意浚

河上當事者八議著為法程以考最陞南比部郎晉京

口太守郡貯海防銀十餘萬吏胥諷以借支名可取正

色拒之尋擢山東副使備兵遼東專司餉務身督車牛

妖民吳金祖聚眾僭號立縛渠魁餘黨解散會遼陽陷

沒無兵可守應乾奉勅印浮海歸朝具疏自劾時經略

熊廷弼奏應乾有輓運平賊功上憐之置不問

雜澤志

李養冲字知白永年人萬厯三十五年進士任池州府

推官遷兵部主事厯官固原兵備叛將援遼遊擊陳愚

直至臨洺大掠八日亡去養冲遣兵誦獲之擢宣府巡

撫都御史崇禎初詔對羣臣於平臺養冲疏言旗尉之

橫且云崇禎初政即天啟敝政上不憚卒坐法死弟養

志字聶許萬厯辛丑進士知章邱縣擢御史按陝西丰

裁獨著終大理寺丞冲子芳蘊芳莎貢生官同知

康熙志參

通志

李養廉字太素永年人兄養冲弟養志皆為大官養廉

被服如寒素敦禮讓人稱長者年八十四卒祀鄉賢子

芳塘崇禎四年進士歷章邱夏津知縣有能名芳漣字浦珠天啟七年舉人掖縣知縣亂後閉戶養病以詩文

自娛著有卧雲齋集

永年志

張其廷字晉陽邯鄲人萬曆三十五年聯捷進士讀中秘書清介自持晉秩兵垣凡儲餉軍國重事無不抗章論之罷職家居愛人濟物倡建柳林閘十八村鄉民迄今猶賴其澤

邯鄲志

王夢蛟字雲龍雞澤人萬曆三十五年進士初知鹿邑縣加意撫恤滌去煩苛復除嵩縣奏最擢御史立朝屢有建白按蘇松常鎮閱罪囚可矜疑者力為開釋改南

京京畿道卒於官

康熙志參舊志

殷大白字白溪雞澤人性嚴毅不輕笑語而博學能文萬曆三十七年領鄉薦累官南京兵部郎出守敘州府權豪斂迹遷關南道副使鎮興安州時巨寇環踞窺近境大白每用間使自相殘殺又屢遣兵追勦大有俘獲會閣部楊嗣昌視師無功懼誅誣劾以自解繫獄坐罪死海內冤之

康熙志

秦德光字端明永年人萬曆三十七年舉人由邢臺教諭遷大同推官舉卓異監軍入援昌平留為贊畫守陵有功終肅州副使

康熙志

宋學道字仲明永年人幼喪母廬墓側三年有聲於時
萬曆三十八年登進士除長子縣講學育才民俗丕變
調封邛治河有功民尸祝之嘗上宰相書二千餘言謂
東事之壞皆由於宰相之不能用人語甚剴切故當路
薦疏以古君子儒今循良吏稱之辛酉丁繼母艱家居
構興學社一區士類景附日與生徒研究格致精一之
旨著書甚富世稱哲揚先生卒年六十三
畿輔人物考
李士高字孟乾磁州人萬曆三十八年進士授岳州推
官調登州明刑折獄民心悅服屢遷戶部郎權准關革
除積弊月放空關二日商民德之罷官後安貧閉戶不

與外事祀鄉賢祠

畿輔通志

張仁聲號洪川磁州人萬曆中以明經授樂至今邑經
奢酋亂民多流亡仁聲至開誠招撫數月而戶口充實
俗獷悍好訟仁聲不事恫喝召兩造案前從容詳訊折
以一二語民皆叩頭心服撫軍使有傳檄來者肆無忌
仁聲使卒捽庭下械繫之以聞撫軍不能庇卒置之法
後稱疾歸卒年八十

舊志參州志

宋學韶字和宇永年人萬曆四十年舉人學問該博從
游問奇者無虛日兄學道弟學易選貢生兄弟文名學
韶爲尤著

永年志

游鯉化字潤六肥鄉人萬歷壬子舉人知寶雞縣有惠政陞延安同知調平陽攝府篆餽贈一無所受以積勞卒貧不能歸司李傅景星周恤遺孤經紀喪事始得歸

葬肥鄉志

李後州志字太素磁州人性至孝友萬歷四十年舉人

知順義縣告歸建祠西園肖二親像朝夕瞻拜事兄恭

謹終身如一日繪堽簾圖以遺子孫舊志

胡沾恩字滄陽永年人萬歷四十一年進士除河內縣

調祥符才情敏練剖決如流歷陞兵部郎出為穎州兵

備道時張山賊欲據宿州以擾廬鳳沾恩率勇敢士破

之兩淮得安以邊材轉甯武參議晉僉都御史巡撫大

同屢立戰功後以屬堡失守坐遣戍畿輔通志 參康熙志

申靈允字洙源永年人萬歷四十三年舉人博覽經史

邃於理學言勤方嚴知鄒平縣甫而月即挂冠歸臨終

自書順受其正無忝所生八字康熙志

劉榮嗣字敬仲號簡齋曲周人幼失怙恃兄榮祖撫育

教誨榮嗣萬歷四十四年進士授戶部主事掌銀庫時

邊事孔亟而餉久不發榮嗣與鹿善繼矯發金華銀濟

邊中使以為不便榮嗣曰苟利國家何惜一死調吏部

出為山東參政捕緝大盜陰消亂萌適三王之國孽盡

供應民不知擾升光祿寺卿累遷工部尚書總督河道
河工向章歲修銀五十餘萬榮嗣僅支二十八萬而竟
建長隄三百七十丈節用愛人有聲於時竟以被讒下
獄死榮嗣性孝友喜賓客工詩古文詞兼精書畫與董
文敏齊名有詩文集行世子為可諸生

康熙志參
山東通志

霍允猷字入白曲周人萬曆四十四年進士初授戶部
主事督餉薊州薊故多閹黨假糧儲牟利允猷嚴絕之
歷官武德兵備道性坦率好施與捐資修學輸粟賑饑
義舉甚多邑人德之

康熙志參路
振飛撰墓志

王介字任軒號念南曲周人清貧自守事母以孝聞鄰

人重其行資以財不受萬曆四十六年領鄉薦官定興
教諭上時務三事於臺使者奇之薦擢東平知州為政
廉平不取贖鍰而正課早辦時閹人方用事大吏曲意
逢迎介不能堪投劾歸嘗謂人曰生平無快事惟立身
不愧先人居官不愧科甲差足慰耳

康熙志
參舊志

李光遠字銓谷邯鄲人萬曆四十六年舉人授漢中司
理陞霍州知州性孝友親有怒俯伏受杖意回乃起愛
其弟凡資產令自擇取邑人謂為真孝廉及任漢中多
所平反抑強扶弱一無所徇以不能媚權貴罷歸

邯鄲
志

馬任遠字毅仲永年人萬曆四十七年進士知葉縣升

戶部主事權吳關魏瑞遣人通懇勸許以卿貳任遠峻

拒之遂矯旨削籍崇禎初復原官遷員外郎督天津糧

儲旋致仕築遂園於沼水上日夕嘯歌吟詩自適康熙志參

永年志

周之氏字節山永年人萬厯間諸生博學能詩工草隸

篆書詩即物寄興有體裁著有鸞鳩集落花詩三十首

傳於世同上

王立極字範用永年人諸生博學強記每至一處必散

步背誦一書乃去友人史記闕頁請書之一字無誤晚

尤邃於易年八十餘卒同上

喬宮字應昌成安人制行不苟高才能文以歲貢為胙

城訓導修祭器濟貧生持經問難者席常滿遷安定教

諭邊徼不習禮讓宮以身教之不踰期士風丕變遷晉

府教授不拜歸里至老手不釋卷同上

盧重華歲貢生永年人任均州學正修太和山志陞河

津令多惠政轉慶陽府通判督鹽池以廉稱檄攝知府

力辭以親老告歸同上

趙宗信曲周人十三喪母繼母申氏待之嚴兩幼弟不

能堪信委曲承順初習儒業為母所阻廢方婚即分爨

粒米不以給困頓無以自存為鄉塾句讀師得脩脯必

以供色養人不知其非申出也母病信以垂白年烘被侍藥滌溺器無怠母感其孝而薄己子鄉黨奉以爲式

曲周志

路從仁曲周人天性友愛有弟四人各因材受業己獨身任勞役白首同居不忍析值歲饑諸弟不忍以多口累兄乃各爨每諸弟田當耕耘者操犁鋤率衆力作爲諸生者給以紙筆兄弟怡怡終身無疾言厲色

同上

梅守法曲周人樂善好施嘗捐地五十畝建義塾延師育俊歲饑輸粟濟貧負債者悉焚其券知縣高公旌其門

曲周志

賀九成字儀庭雞澤人居鄉仁厚嘗過邢家隄見商船沈溺淦水出重貲援救得活由太學任汝州吏目汝固膏腴地致仕歸囊橐蕭然州道重其廉慎挽留弗能得士民出涕遮道送之子瑞徵天啟丁卯舉人諸子皆入

邑庠

雞澤志

郭都字舜俞雞澤人恕六世孫事祖母以孝聞田園讓弟以明經初司訓滄州調確山兩攝縣篆有惠政民歌之曰免催科禁訟獄不貪火耗不貪贖從來借寇罕其儔清比冰兮潔比玉告歸家居二十年自奉甚薄有里人行竊被獲予金令貿易自給其人遂改於善年八十

九猶手不釋卷同上

齊宗閔字子孝雞澤人年十七為郡吏守法奉公諳練時務力贊郡守定條鞭法歷任蒲臺典史濮州吏目沁水濟陽主簿俱有能名轉趙藩典儀正致仕歸以桑梓利害為己任念優免折地有累編氓著望治錄洛西十三村苦沙水驟至無所洩宗閔度地開渠一方賴之年八十有八卒康應乾撰傳

馬在田字汝見廣平人以歲貢薦授懷仁訓導懷仁近邊鄙士率野倨在田設科條課以文藝諸生蒙其陶鑄者甚廣暮年而邊士彬彬丕變尋陞中州襄城教諭以

身率士程業必先平實而革浮華嘗捐俸以賑郵寒士士倫懷服上官雅重之薦擢陝西兩當縣令有惠政凡民利病洪纖罷興無遺力慈祥愛人一邑呼為父母後忤當路歸田工古文詞喜吟咏士林咸推尊之廣平志

宋思忠字君蓋廣平人萬厯間以貢授滄洲訓導每朔望進諸生於堂談道論文飲酒賦詩諸生有窘迫不自振者輒分俸給之上臺交章薦舉行將超擢偶與顯宦某語不合慨然曰五斗米豈足繫吾身耶遂挂冠去同上尹言字守忠威縣人夙負大志五上春官未博一第乃投牒銓曹自筮仕以來厯年一十有九為縣令者二州

牧者三郡丞者一所至修城垣疏河渠崇聖祠諸所厝
施宏功偉績甚多至於冰蘖操持一塵不染垂歿時有
箱篋扁鑰甚密意必黃白也子孫啟之惟故衣書籍而

已威縣志

高登雲字君霞威縣人十三歲補博士弟子員八上棘
闈未售遂肆力於古文辭晚工詩與弟凌雲聯翩競爽
時目為洺川二龍著作甚多有鷓鴣秣陵等集及論語
百篇詩讀史諸詩行於世同上

邵雨祖臨淄縣人萬厯間遷居清河縣城東南邵家莊
性廉靜好濟貧乏四鄉感慕因舉為孝廉初仕大名府

兵備道繼升為江西巡按為官愛民如子年登九十八
卒清河志

張汶字陵江邯鄲人國彥曾孫以廕為都督府經歷性
鯁介因議京餉事廷辱魏闔闔怒矯旨杖一百汶聲色
愈厲或勸之少貶汶曰頭可斷志不可回也遂就械絕

飲食而死崇禎初贈刑部員外郎康熙志

楊四教磁州人監生萬厯中為臨潼丞倜儻豁達臨事
井然與邑令馬民牧主簿劉化國稱一時之良云陝西通志

侯君擢字際明成安人天啟元年舉於鄉署大名教諭
課士有聲擢陝西甘泉縣殫心經畫民困以蘇丁內艱

起服知河南武陟縣以廉明愷悌聞防河禦寇悉協機
宜升陳州知州甫之官而寇至同鄉官崔泌之率士民
分堞守身先士卒運木石擊賊城濠皆滿守七晝夜賊
遣使說降斬其頭懸城上賊怒急攻城陷被縛罵不絕
口死事聞贈右參議祀陳州名宦祠更建祠於陳橋驛
祀之廕一子入監讀書畿輔通志參明史

張慎行曲周舉人天啟初知磁州崇重學校搏擊豪強
士民畏服磁州志

盧國讓字豎齋永年人武進士以功歷官遊擊因爭坐
毆職官譴戍單騎巡邏望敵騎出獵潛伏巖下刺之敵

驚走撫臣奏其勇後累升宣府遊擊以指揮同知致仕
舊志

申為憲永年人由天啟二年進士官山東副使崇禎十
五年

大清兵破城殉節死雍正志

國朝賜諡節愍勝朝殉節錄

殷淵字仲宏雞澤人負奇氣有文武才好舞鎗擊劍嘗
以兵數騎破賊萬餘賊中驚傳殷公子神勇不可犯父
大白官監軍副使為楊嗣昌所殺淵上書請代跪朝門
五日嚴旨詰責淵痛父冤莫訴遂棄舉子業隱廣陽山

中甲申賊犯京師倡義勤王作討賊檄率兵二千至柏鄉聞都城陷乃還設龍亭哭臨賊眾至遂被殺於明倫堂暴屍烈日中十餘日不壞有黃犬守之不去

國朝乾隆十八年知縣王光燮請從祀鄉賢又於學宮南立專祠尋奉

旨准入祀忠義祠

勝朝殉節錄參 畿輔人物考 案明史淵 嘗欲報父讎及賊破雞澤謀起兵恢復俄聞

京師陷即同諸生黃祐等悲號發喪約山中壯士誅賊所置官偽令秦植踉蹌走乃入城行哭臨禮義聲大震為奸人所乘被殺遠近悼之

陳廷謨字獻明成安人天啟二年進士除山東沂水縣時邑新被寇里巷蕭條廷謨悉心招徠民漸復業以卓

異調益都沂水乞留不獲建生祠祝之丁卯朝廷徵兵青州各屬兵集郡城外索餉鼓譟廷謨單騎往諭發庫銀二千給之乃就道以治行第一擢御史督鹽河東革報納派場掣放車戶等弊修宏運書院館山西陝西河南三省士子庚午流寇犯絳州廷謨指授方略擊賊賊宵遁以艱歸服闋巡按四川流寇逼漢中廷謨捐金充餉發穀賑饑修廣元保甯城垣聲績卓著事竣就川南候代寇猝至廷謨行撫軍事調兵措餉而月圍乃解以疾乞歸家居八月而卒所著書集行世

畿輔通志 參康熙志

白南金字礪甫永年人性倜儻不羈少為諸生不喜事

帖括專肆力於詩所製自成一家脫去窠臼趙儕鶴魏懋權李霖寰諸先達皆亟稱之有沼詞二集行世舊志

鍾希顏字心卓清河人天啟二年進士官冀北道參議值亢旱希顏致齋祈禱雨立澍以直道忤時致仕蕭然四壁吟詠自得崇禎十一年城陷不屈死畿輔通志參舊志

楊承芳字春臺清河人天啟二年領鄉薦仕甯國別駕升太平少府行政廉明公允嘗題聯於署曰聖訓昭昭當由己以克己王法凜凜不殺人以媚人時流氛日熾承芳練兵備禦萬姓賴之勒碑望夫磯以志其德尋以才望召衡士南闈繼又靖難溧陽旋聞訃歸里絕意仕

進屢徵不起課二弟承宣承明與一時來學之士講明道學侍御李嵩旌其第曰泰山北斗時明季兵荒洊臻逃徙者哀鳴中道承芳就隆興寺舍安慰流民給以錢粟又於南關煮粥以賑貧民由是全活甚眾卒年七十七子思祖貢成均孫潤濬俱入邑庠清河志

秦羽明字中南清河人天啟二年進士家貧博學邑令鄭公見而奇之羅致幕下古今典籍肆其博覽後與宋權同筆研下帷攻苦宋甚重之登進士後任兵部會邊警防守勞瘁卒於官有文集數卷同上

張鏡心字孝仲磁州人仁聲子天啟二年進士除蕭縣

調泰興捐資代完逋賦全活無算擢禮科給事中請與錢鉉羅綺何景明諡皆允行時大雨雹鏡心引春秋傳注言大臣專權所致帝令實指鏡心遂劾吏部尙書王永光數事疏留中擢右給事中封岷藩以廉著聲遷吏科都給事掌大計溫體仁以私屬默不應流寇猖獗鏡心疏薦范景文且請重左良玉權以張河北之勢時論躉之累遷兵部右侍郎兼右僉都御史總督兩廣軍務粵地瀕海奸商時勾島夷爲患鎮守中官陳謙藉番市以漁利事益亟鏡心劾罷之檄參將黎延慶駐師於巒而命以市貨給之紅番遯去乃環視地形要害撥兵堵

守海警以甯連川奴民倚篁箐爲窟穴肆剽劫鏡心授計參將施王政密擒之復請會沅虔撫臣協勦楚地山寇親視師韶州令諸將由主簿洞搗高柴二源楚氛遂靖把總胡鳳蕭煽惠州兵譁於途鏡心佯不省徐以事稍分遣之而密約巡撫御史赴惠大閱徧布諸軍圍叛卒擒斬首惡四十九人粵兵股慄盤古諸洞久爲賊巢鏡心遣兵平定之拔良民一千三百餘戶拓田一萬五千餘畝上嘉其功賜金綺粵山多田少歲稍歉民輒流離鏡心撙節浮費得四萬金積穀數十萬石粵人賴之入爲兵部左侍郎升尙書總督薊遼軍務以親老乞終

養歸旋值鼎革遂隱居不仕鏡心事親孝治家嚴謹與
倪元璐黃道周范景文劉理順諸君子善道周以忤時
下獄親黨懼被累皆隱匿鏡心獨以三百金致其家道
周後知之曰孝仲所遺固可受也其為名賢所重如此

卒祀鄉賢祠

畿輔通志

鄭之望字蕙圃永年人天啟四年舉人性至孝事繼母
尤謹篤兄弟友愛中外無間言與申端愍公為莫逆交
左蒼嶼督學畿輔賞其文呼與語喟然曰公輔器也鄉
舉後益務謙下鍵戶卻掃肆力經傳竟以讀書過瘁咯
血成疾卒

申涵光撰墓志

沙蘊金字仲蓼威縣人天啟四年舉人早歲失怙事母
郭色養曲盡事長兄如嚴父撫四歲弱弟範金日夜勸
課底於成立凡族中不克婚娶者靡不周濟筆耕屢空
以道義名節自礪筮仕河南湯陰令湯本南北衝衢輪
蹄接踵簿書蝟集蘊金理煩治劇恢恢有餘去之日民
為立德政碑擢陞南京上元縣尹遷南京戶部主事以
勞瘁卒於任

威縣志

劉光字青藜威縣人處鄉閭姻族恂恂無疾言遽色以
選貢授繁峙令子諒和易雅得民心及賊至城下身率
士民登陴固守邑賴保全厥功尤著

同上

張懋勤字廣惟肥鄉人學顏孫家貧好讀書絕意仕進
藏書樓上羅列如城晝夜諷吟寒暑不輟著述甚多
肥鄉志

路振飛字見白

案人物考
字皓月

曲周人天啟五年進士除涇

陽知縣大吏諂魏忠賢將建祠涇陽振飛執不從邑人
張問達忤闖坐追贓十萬振飛故遷延闖敗事解流賊
入境擊卻之崇禎四年徵授御史疏劾周延儒卑污奸
險黨邪醜正祈立斥以清揆路被旨切責未幾陳時事
十大弊曰務苛細而忘政體喪廉恥而壞官方民愈窮
而賦愈亟有事急而無事緩知顯患而忘隱憂求治事

而鮮治人責外重而責內輕嚴於小而寬於大臣日偷
而主日疑有詔旨而無奉行疏入詔付所司山東兵叛
劾巡撫余大成孫元化且論延儒曲庇罪帝不問已劾
吏部尙書閔洪學結權勢樹私人秉銓以來吏治日壞
洪學自引去廷推南京吏部尙書謝陞爲左都御史振
飛歷詆其醜狀陞遂不果用六年巡按福建海賊劉香
數勾紅夷入寇振飛懸千金勵將士遣遊擊鄭芝龍等
大破之詔賜銀幣俸滿以京卿錄用初振飛論海賊情
形謂巡撫鄒維連不能辨語侵之維連罷去命甫下數
奏捷振飛乃力暴其功維連復召用八年夏帝將簡輔

重刊廣平府志 卷五十一
臣振飛言枚卜盛典使夤緣者竊附則不光如向者周延儒溫體仁等公論俱棄宅揆以後民窮盜興辱己者必不能正天下時延儒已斥而體仁方居首揆銜之已而振飛按蘇松請除輸布收銀白糧收兌之四大患民困以蘇會常熟錢謙益瞿式耜爲奸民張漢儒所訐體仁坐振飛失糾擬旨令陳狀振飛白謙益無罪語刺體仁體仁恚激帝怒謫河南按察司檢校入爲上林丞屢遷光祿少卿十六年秋擢右僉都御史總督漕運巡撫淮揚明年正月流賊陷山西振飛遣將金聲桓等十七人分道防河由徐泗宿遷至安東沐陽且團練鄉兵犒

以牛酒得兩淮間勁卒數萬福周潞崇四王避賊同日抵淮大將劉澤清高傑等亦棄汛地南下振飛悉延接之四月初聞北都陷福王立於南京河南副使呂弼周爲賊節度使來代振飛進士武愨爲賊防禦使招撫徐沛而賊將董學禮據宿遷振飛擊擒弼周愨走學禮竿弼周法場命軍士人射三矢乃解磔之縛愨徇諸市鞭八十檻車獻諸朝伏誅五月馬士英欲用所親田仰乃罷振飛振飛亦遭母喪家無可歸流寓蘇州尋錄功卽家加右副都御史振飛初督漕謁鳳陽皇陵望氣者言高牆有天子氣唐王聿鍵方以罪錮守陵中官虐之振

重刊廣平府志 卷五十一
飛上疏乞概寬罪宗竟得請順治二年

大清兵破南京聿鍵自立於福州募能招振飛者官五品賜
二千金振飛赴召道拜太子太保吏部尙書兼文淵閣
大學士官一子職方員外郎又錄守淮功廕錦衣世千
戶王每責廷臣怠玩振飛進諫其言曲中王短三年

大清兵進仙霞關王走汀州振飛追不能及明年赴永明王

召卒於途

明史

國朝追諡文貞

畿輔人物考

王建極字素徽威縣人家貧力學登天啟五年進士侍
經筵稽古陳謨適合上意賜白金文綺以親老乞終養

崇禎戊寅城陷死祀鄉賢祠

康熙志參縣志

苑尙質字樸庵雞澤人事親最孝父所遺產悉讓諸兄
天啟中以明經歷亳州禹州訓導陞趙藩教授所至以
身範多士

雞澤志

劉雲字從龍邯鄲人以歲貢爲陝西華州同知責在督
儲大戶歲以常例賂督儲夤緣爲奸雲至痛革前弊官
七年先後如一日謝政後惟守先人田廬免饑寒而已

邯鄲志

王受人字虛受廣平人世揚孫天啟中以廕授南京後
軍都督府都事歷轉戶部員外郎權揚州鈔關革灣頭

開宿弊關例足額外盈餘悉蠲施津潤寒士尋由郎中
出守嚴州府值歲飢設法煮賑全活無算嚴人為立生
祠受人聞之力阻其事去任後為立去思碑崇禎時邑
令李固本虧帑千緡受人代完之不受券弟海豐遺產
在館陶縣卒後無嗣受人具呈縣令改為學田士林德
之賀應旌
撰傳

秦廷奏字進思號聖俞曲周人崇禎元年進士歷知輝
縣穎上汝陽皆以廉明稱在汝陽值闖寇亂備禦有方
擢御史按宣大兼攝學政時巖疆多事羽書旁午廷奏
調度兵食規畫戰守竟以勞瘁卒於官贈太僕寺少卿

子珣舉人璟進士皆醇謹力學克繼家聲未仕早卒

舊志

參康
熙志

劉慶孫字克成永年人尚卿子崇禎三年舉人嗜學不
倦為文根據理要為後進師法著有四書集註考詩經
集註考益堅詩鈔雪齋寄筆唱隨集菊詩千首子鏡從

子鑑同舉於鄉

永年
志

劉兆基號臨宇廣平人弱冠補弟子員大名兵備道丁
某征勦流寇兆基獻策中途丁誥之曰流氛徧野何自
而起對曰貪官汙吏上下相瞞故耳丁長揖謝曰久不
聞斯言吾當即表汝平賊辭以願從科目出身因棄文

就武崇禎辛未會試以第十三名入彀御批真金不怕
再鍊書名御屏儲邊材備用旋授威遠堡守備陞河間
府都司軍民咸戴巡撫黎欲薦以專閫因不善趨媚為
宦寺所啣解印綬歸後聞京師陷大哭累日閉門不出
優游林下二十餘年以疾終

廣平志

申佳允字孔嘉永年人父化字幼岩幼孤事母以孝聞
佳允六歲而孤家貧以節操自勵崇禎四年成進士授
儀封知縣縣故多盜佳允嚴保甲法盜無所容霍雨河
決艤舟怒濤中塞其口捕大猾置之法以才調杞縣八
年賊掃地王率萬人來攻城土垣多圯佳允募死士擊

走賊因璧其城唐王聿鍵勤王將抵開封諸大吏惴恐
集議曰留之不聽行守土者且得罪佳允曰惟周王可
留之眾稱善用其計治行卓異擢吏部文選主事上備
邊五策進考功員外郎佐京察大學士薛國觀傾少詹
事文安之安之佳允座主也事連佳允佳允上書太宰
言其師清端蜚語無左驗願身先為師受譴左遷南京
國子博士久之遷大理評事進太僕丞閱馬近畿聞李
自成破居庸歎曰京師不守矣君父有難焉逃死馳入
都遍謁大臣為畫戰守策皆不省貽子涵光書曰行己
曰義順數曰命義不可背命不可違今日之事君父之

事死義也猶命也我則行之京師陷冠帶辭母策馬至
王恭厥從者請易服以避賊佳允曰吾起微賤食祿十
三年國事至此敢愛死乎兩僕環守不去給之曰吾不
死也我將擇善地焉下馬旁見灌畦巨井急躍入僕號
呼欲出之佳允亦呼曰告太安人有子作忠臣勿過傷
也遂死年四十二贈太僕少卿諡節愍

明史參 畿輔
人物考縣志

國朝賜諡端愍

旌忠
錄

李昌期字邳隆永年人崇禎四年進士擢兗州府推官
土寇起昌期監軍以計破斬萬餘衆推其才大盜李青
山率衆來犯昌期偕魯府左長史俞起蛟鄉官給事中
范淑泰出擊復大捷崇禎十五年

大清兵四萬薄兗州城昌期分門守禦至十二月八日城陷

死之贈僉事廕一子入監讀書

明史參
縣志

國朝賜諡節愍

勝朝殉
節錄

楊調鼎字位予成安人博學好古登崇禎四年進士除
河內縣浚渠百里以資灌溉駐防兵萬餘以缺餉鼓譟
調鼎徧歷軍中開誠曉諭衆遂定撫按交薦入爲禮部
主事歷員外郎轉河南驛傳道流寇攻開封調鼎協力
守城不遑起處者五閱月圍乃解升督糧參議時疊經
兵荒民困甚調鼎不忍腴民遂解組歸年八十卒

畿
輔通

志參康
熙志

于起龍字仲飛雞澤人崇禎六年舉人性至孝家貧嘗館京都藉修脯以供菽水凡宴會有珍果輒秘藏數顆固封寄家啖母戊寅城破死難雞澤志

張濩字瑞澤邯鄲人國彥曾孫崇禎六年進士授中書轉四川道御史首請行考績之法巡按廬鳳淮陽時值泗水溢乘舟按視捐金發粟全活十餘萬人修泗州浮橋築長隄數里以衛城尋遷鄖陽參議時房保等縣皆賊窟濩相形勢建防置守寇不為警既歸杜門謝客年七十五卒舊志

張修身字明德曲周人以武舉任茨溝營千總崇禎七年防邊被執脅令詐茨溝城不從以刃劫之志愈堅遂見殺事聞廕一子總旗食百戶俸曲周志

王世錦磁州人崇禎七年流寇薄城世錦出粟三百石餉守城軍士俾無饑乏城賴以完畿輔通志

王國卿字君佐曲周人賦性孝友兄學賈負逋甚巨國卿破產償之家因中落益砥礪廉隅室無餘蓄而處之泰然里中有疑難事必竭力解紛貧乏相告者周恤不遺餘力崇禎七年卒子顯進士雍拔貢頤舉人曲周志

賈于廷邯鄲人銓曾孫以歲貢授靈壽縣訓導值歲凶

捐俸煮粥賑之直指剡薦尋以城守死難邯鄲志

張洞字如心邯鄲人尚書國彥曾孫幼失怙事母以孝

聞友愛諸弟終身無間言崇禎丙子登賢書篝燈課子

凡圖書歷數諸子百家無不究悉其卒也人皆惜之同上

胡淵字見心永年人幼孤力學為名諸生兼善擊刺崇

禎十年以貢選盱眙主簿時流賊已陷廬鳳諸州縣盱

眙故無城淵贊知縣蔣佳徵度地形畫戰守策佳徵奇

敬淵時淵莅官甫二十七日佳徵乃謂淵曰公初至可

以去盍避地乎淵曰公何不避佳徵曰吾與此土共存

亡耳淵泣曰淵讀書一生惟君父耿耿方寸間亦誓以

死報國矣佳徵亦泣乃分地以守淵持戟率民兵駐龜

山寺賊至淵力鬪殪數人賊駭欲遁而淵所乘馬忽蹶

遂被執奮罵而死事聞贈上元縣主簿予祭明史參
永年志

國朝賜諡烈愍勝朝殉
節錄

楊陸凱字庭堅永年人武生有謀略善技擊盧象昇備

兵大名廣平順德三郡陸凱求自效象昇與語奇之署

為掌牧以功擢千總崇禎十年象昇督天下援兵疏薦

陸凱給守備告身十二月十一日象昇師至蒿水橋麾

兵亟戰陸凱格鬪甚力自辰至未礮盡矢窮象昇身中

四矢三刃遂仆陸凱懼眾殘其屍已伏其上背負三十

四矢以死通志 畿輔

國朝入祀忠義祠勝朝殉節錄

史俊秀清河人庠生幼失恃父憐之令讀書勿過瘁俊

秀乃以香火易燈永夜默誦父歿哀毀異常鬚髮盡白

葬祭誠敬盡禮壽至八十有三長子奉命崇禎十一年

城陷不屈死人稱為一門孝義云清河志

石守道肥鄉人崇禎戊寅兵亂守道負母走將渡河兵

至欲殺其母守道哀請釋母不許因置母於地直前觸

刃騎卒爭磔之母以是得渡河去通志 畿輔

康霖與弟震俱雞澤庠生崇禎戊寅城破見母遇難兄

弟爭救皆被殺舊志

賈前王威縣庠生其父官知州崇禎戊寅城陷前王奉

父藏匿他室兵卒至索金前王給之曰吾父清白吏何

處得金吾有金在某處盍往取之由是其父得免而前

王遂死於難通志 畿輔

陶盤成安人父卒卧於柩側者十二年及母歿遂合葬

廬墓終喪猶不歸竟卒於墓側事聞旌表舊志

王茂遠清河拔貢生謁選得靈壁縣知縣平易近民廉

明不擾有五柳先生風棄官歸里戊寅城陷殉難清河志

王茂松字節堂清河庠生明崇禎戊寅守城殉難

國朝乾隆六年入祀忠義祠同上

馬鍾星永年諸生家臨洺鎮崇禎十一年率鄉勇禦敵

手刃數人力盡被執死同時死者有穆席珍亦邑諸生

遭變眾爭逃避席珍護母不肯去被執死畿輔通志

陳愈美字景虞雞澤人性孝友父所遺產悉讓之兄兩

舉優行以明經官獲鹿訓導戊寅之變獲邑陷左右勸

之去不從冠帶至大成殿再拜積薪自焚死雞澤志

康大猷字燦五雞澤人令同官邑界山僻居民不習紡

織體無完衣大猷造紡車召老嫗數人教之不踰年民

諳其事機聲達乎四境告歸值戊寅之變被執不屈死

趙廷對字步初雞澤人官青州教授課士循循有法多

所修建致仕歸戊寅城破提劍大呼義氣激烈賊怒以

刃威之不屈與子德潤同遇害

王廷諫字棘垣雞澤庠生幼失怙恃家貧授徒以奉祖

父及繼母孝敬盡禮戊寅城破衣冠拜祖父神主自縊

知縣賈益謙表其門曰烈節可風又同庠齊應選墜城

死舉人賀瑞徵投井死俱同上

高天祥永年城西鄉農人崇禎十三年大饑羣盜起脇

天祥與俱天祥不從盜怒殺其妻子以刃擬天祥天祥

曰吾拌一死久矣豈從汝作賊耶盜支解之永年志

王國明廣平庠生崇禎十二年冬寇薄城下國明率死

士數十人出禦之力戰竟日死

畿輔通志

國朝入祀忠義祠

勝朝殉節錄

宋如濂永年人學道之孫崇禎十五年寇執其父頤格

通志作頤恪

將殺之如濂以身蔽父遂遇害

畿輔通志

冀一貫永年人性慈祥樂施予環居多待以舉火者嘗拾遺金待其人還之間姓氏不以告孫如錫貴贈尙書

舊志

張鷹揚曲周人以武進士授陳州守備流寇陷城左右言視事日淺可以無死鷹揚曰此吾死所也安可逃乎

揮短兵巷戰死

畿輔通志

案李自成陷陳州事在崇禎十五年見明史關永傑傳

國朝予諡節愍

勝朝殉節錄

王開基字創之雞澤人廩生博學勵名節官滿城訓導歸後聞闖逆變起時坐矮室中放聲大哭有時佩刀行田野間至暝乃歸人莫測也崇禎十五年

大清兵至遇開基於場圍逼令薙髮易巾開基厲聲曰我有明生員豈能易制哉持所佩刀刺兵兵舉刀相格眾兵

從後掩殺之

王鍾信年譜

馬學古雞澤人母年八十三所居失火不能動履學古冒火入以被裹母躍出母得活學古傷火三日死

舊志

郭秉忠永年人任寬河衛千戶與敵戰矢傳面不衰志明

常天祐字予懷成安人家貧力學甌中生塵泊如也旋

入邑庠丁內艱朝夕哭奠時大饑斗米一金民皆相聚

為盜天祐欲他往以母柩未葬不忍行赴學領賑得穀

三斗至中途為賊所奪且欲擁以為首天祐給之曰歸

家辭母明日從汝乃釋之天祐歸痛哭於柩前自經死

明日賊來見天祐已死羅拜而去時崇禎十五年也其

鄰張浩率鄉人葬之畿輔通志

王一統康熙志字萃州成安人歲貢生性孝友妻亡不

再娶修文廟立義學居家多義行官趙州訓導崇禎十

五年

大清兵破趙州一統死節明倫堂明史參康熙志

國朝入祀忠義祠勝朝殉節錄

劉鎰字珍思永年諸生鉅野知縣鏡弟也崇禎甲申流

寇掠鏡西行鎰毀形持木棒隨其後卒與兄俱歸時人

歌詠其事名為義棒集畿輔通志

冀運洪曲周人崇禎時諸生甲申國變曲邑城卑戶弱

人無固志運洪與同庠生王瀛霍度岳霆等推縣丞張

天爵權縣事擒偽令孫應震羈之別所并執平鄉逃令

囚繫之乃為帝發喪制服歆盟團練鄉民嬰城固守會

應震等與舊千總王來朝通謀城破運洪等俱被執罵賊不屈死天爵亦死之舊志

王聯芳曲周人明末潰兵劫掠傷聯芳父聯芳直前救

護與父俱死畿輔通志

唐起元字伯汾肥鄉人官潞州衛指揮僉事崇禎甲申

聞李自成入畿輔率家僕數人追賊至鉅鹿力戰沒於

陣子印昌生員肥鄉志

劉為可字小善曲周人性超逸能文章尤以孝著崇禎

時父榮嗣為嫉者搆陷械繫京獄為可泣血奔隨冒死

求代榮嗣卒於獄為可亦斷食死舊志參縣志

陳三黑曲周人年八歲父母為土寇張調甫所殺三黑

痛罵之賊曰罵亦殺汝汝不懼邪三黑罵愈力賊怒以

刀砍之罵不絕口死同上

宋湯齊肥鄉人崇禎時諸生京師陷湯齊與同庠郭珩

王拱宸等起兵討賊為賊將張汝才所殺畿輔通志

國朝入祀忠義祠勝朝殉節錄

常仕艾成安人充正定營書四十年崇禎末從征流賊

受箭傷且死悲歌曰報國一心終未遂願為厲鬼向西

征遂死撫院楊聞之嘉歎令厚卹之畿輔通志

國朝入祀忠義祠勝朝殉節錄

王蓋臣字鼎鉉威縣人崇禎時庠生家貧授徒養母及母歿日夜哀號泣盡繼之以血遂死

舊志

案舊志列永年秦良廬墓查明史孝義傳敘作永平人又列曲周李瑞袁松李萬鍾郎汝梅肥鄉張桂雞澤郝臣廣平張松韓承祚成安李璜威縣周浩王夢賢夏朝語清河戴乾陳隆孫建皆親喪廬墓以孝行著又列曲周胡希周喬鳳山廣平李守官高梅邯鄲李震龍皆割股奉親無事實可考附記於此

